

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 29 1940

T 5148/0.82

8

山西通志卷第十五

山西巡撫都察院右副都御史臣覺羅石麟奉

旨修輯

關隘七

遼州

黃澤關州東一百二十里十八盤山路通河南武安縣元舊

關也明洪武十一年設巡檢司今復設弁兵駐防周三百

六十步高一丈十八盤東西一徑盤旋路有十八轉即

黃澤關摩天嶺州東九十里峯巒峻絕勢欲摩天轉

鞍嶺州東八十里嶺勢高險崎嶇難行地形志遼陽有

黃澤嶺宋志遼州有黃澤砦宋志磁州武安有固鎮

永安黃澤海回四砦金關一黃澤元元統二年晉寧

哈佛大學漢和
圖書館珍藏印

路遼山縣十八盤立巡檢司

國朝順治十一年撥兵駐黃澤關康熙六年撥攜室兵永爲駐防 郭緣生述征記滏口陘在磁州武安縣當以黃澤關爲正後魏永安中齊神武就食山東自晉陽出滏口太行中神武自鄴入滏口擊爾朱兆於晉陽卽關東西道也 隋煬帝初漢王諒將綦毋良自滏口徇黎陽塞白馬津 余公理自太行下河內俱爲行軍總管史祥所敗 梁乾化三年五月賀德倫告急於晉晉王引大軍自黃澤嶺東下與苻存審會於臨清遂入魏博 梁貞明元年開封尹劉鄩以兵屯於魏唐莊宗入魏鄩謂晉兵悉從莊宗赴魏而太原可襲乃結草爲人執以旗幟以驢負之往來城上而潛軍出黃澤關襲太原晉兵望梁旗幟往來不知其去

也 以故不追及軍去已二日莊宗曰劉鄩長於襲人短於決戰計彼行纔及山下亟發騎兵追之會陰雨積旬黃澤道險泥深尺餘士卒援藤葛而進皆腹疾足腫或墜崖谷十二三晉將李嗣恩倍道先入鄩至樂平不克進而旋明正德六年賊楊虎等自十八盤還破武安 田悅自稱魏博留後欲阻山爲界曰邢磁如兩眼在吾腹中不可不取發兵圍之邢州刺史李共臨洛州將張仵堅壁固守告急於澤潞節度使李抱真請討之 唐會昌四年詔發昭義騎兵五百步兵千五百戍振武潞卒乘醉回旗入城閉門大譟節度使盧鈞奔潞城以避之李德裕奏請詔河東王宰以步騎一千守石會關三千自儀州路據武安以斷邢洛之路又令河陽石雄引兵守澤州河中韋恭甫發步

山西通志 卷十五
騎千人戍晉州都將李文矩以禍福諭之乃遣人謝盧鈞於潞城鈞還入上黨復遣之戍振武行一驛乃潛選兵追之明日及於太平驛盡殺之

八賦嶺西一百里地隸和順壤接榆次太谷漳水在遼境者起州西八賦嶺地形志樂平有八賦嶺

摩天嶺東一百一十里武安界東六十五里至芹泉鎮九

十里至大南莊一百一十里至摩天嶺

黃澤關下云東一百一十里者此繇武安界言之也黃澤關不叙摩天嶺形勢不全而摩天嶺又自有形勢故復見焉

莊峻嶺東北一百一十里邢臺界

土門嶺南三十里兩峯對峙如門 翻轅嶺南三十里路最

陡險 州南路村有隘隅口

上交漳 下交漳 蛤蟆灘 千畝川 狐兒巖 熟峪村

洞子巖 十里店 東西寨村 相峪村 申家灘

雲頭底 柏兒峪 馮婆峪 七里店 石匣村 直峪

溝 夫峪里 後窰峪 宋家口 突堤村 曹家寨

芍藥溝 秋林灘 故縣堡 版峪堡 東西五指 莊

窠巖 隘峪里 紅巖里 長城鎮 桐峪鎮 寒桃鎮

栗城鎮 黃漳鎮 芹泉鎮 拐兒鎮 麻田鎮

和順縣

黃榆嶺口東七十里又東五里直隸邢臺縣界路通順德府

山勢崎嶇巉峻直上二十里南連清風帖北接馬嶺口爲

太行絕頂東疆第一險隘地明洪武三年置巡檢司後裁

今設防兵據守 黃榆嶺關 清風嶺關北三十里順德府

西南一百八十里石磴盤旋形險道衝邊墻敵樓官廨軍壘悉備汎隸順德府嶺有重關巖高木密黃榆古戍卽此漢

建安九年袁尚武安長尹楷屯毛城通上黨糧道夏四月曹操留曹洪攻鄴自將擊楷破之而還

馬嶺關黃榆嶺關北三十里順德府西北一百六十里居民

千家山勢殊險邊墻敵樓官廨軍壘悉備下有澗溝二十

餘丈名鬼谷相傳王詡藏修於此又卽龐涓夜度處汎隸順德府

清風嶺關黃榆嶺關南三十里順德府西南一百八十里山

勢高聳盛夏不知暑邊墻敵樓水門各一澗水通流其下

汎隸順德府

露蘿嶺關順德府西一百八十里兵禦悉備汎隸順德府

黃背巖關在沙河縣西南一百九十里山勢崇高兵防悉備

北至數道巖關三十五里

數道巖關在沙河縣西一百五十一里澗溝之路旋繞數層

八賦嶺口西一百二十里儀城鎮嶺有二懸崖曲磴西北曰

黑虎關赴太原要道西南曰青龍關赴平汾要道設巡檢

司古儀州城址尚存

松子嶺口北四十五里和順樂平二縣界山勢最高四季風

鳴蜿蜒與曲袤亘二十餘里嶺有關路通正定五代河東

守險之地今潞澤遼入直隸孔道也明正統八年置巡檢

司後裁今設防兵汎守

石鼓嶺南四十五里上有石鼓王思誠詩南嶺風吹石鼓

鳴

風門嶺又東五里邢臺縣界

桃樹平嶺又東五里邢臺縣界

黨城口東四十五里又東二十里至風門嶺東北二十五里

至黃榆嶺口

和順古城在縣城西北與縣城相倚垣蹟微存周圍四百六十步古闕與聚也 周赧王四十六年秦攻趙闕與不拔

秦伐韓軍於闕與廉頗樂乘曰道遠險狹難救趙奢曰道遠險狹譬之猶兩鼠鬪於穴中將勇者勝趙惠文王令趙奢將救之兵去邯鄲三十里而令軍中曰有以軍事諫者死秦軍軍武安西鼓譟勒兵武安屋瓦盡振軍中候有一人言急救武安奢立斬之堅壁留二十八日不行復益增壘秦間來入奢善食而遣之間以報秦將秦將大喜趙

奢已遣秦間乃卷甲而趨之二日一夜至令善射者去闕與五十里而軍軍壘成秦人聞之悉軍而至軍士許歷請以軍事諫奢曰內之歷曰秦人不意趙師至此其來氣盛將軍必厚集其陣以待之不然必敗奢曰請受令歷曰請就鈇鑕之誅奢曰胥後令欲戰許歷復請諫曰先據北山上者勝後至者敗趙奢許諾即發萬人趨之秦兵後至爭山不得上趙奢縱兵擊之大破秦軍秦軍解而走遂解闕與之圍而歸王賜奢號爲馬服君以許歷爲國尉 如耳見成陵君曰昔魏伐趙斷羊腸拔闕與 括地志闕與聚落今名烏蘓城在潞州銅鞮縣西北二十里又儀州和順縣城亦云韓闕與邑二所未詳又有闕與山在洛州武安縣西五十里 正義闕與山在洛州武安縣西南五十里

趙奢距秦軍於闕與卽此山也按括地志云言距秦軍在此山疑其太近洛州旣去邯鄲三十里而軍又云趨之二日一夜至闕與五十里而軍壘成據今洛州去潞州三百里間而隔相州恐潞州闕與聚城是所距據處 正義闕與故城在潞州及儀州 索隱在上黨沾縣西 通典漢沾縣地卽韓之闕與邑 通典儀之和順韓之闕與 寰宇記今名曷蕪城銅鞮西北二十里今潞之銅鞮故闕與城漢梁榆也九域志一曰榆城盧川征艱賦訪梁榆之虛郭乃闕與之舊都卽此 明一統志闕與城名在沁州城西北二十里史記趙奢大破秦軍解闕與之圍卽此地漢曰闕與聚俗呼烏蘇村 按諸說惟水經注索隱及括地志和順縣城得之正義未有計過險狹及旣去邯鄲三語

亦善畫道里形勢蓋二日一夜至闕與五十里是趙兵業過黃榆嶺口不懼其險狹難救也先據北山是先據松子嶺松子嶺在縣北三十里不類八賦石鼓之遠而山又最高險得以高臨下之勢也沁州西北二十里烏蘇村距吾兒峪太遠非邯鄲進兵便地武安縣西南五十里正義辨已哲 韓信擒夏說於闕與亦當屬和順蓋和順北百六十里而至柏井驛爲信駐兵地又三十里而至井陘口道里殊不遠也今縣有韓信舊寨古壘尚存

馬嶺曲鎮東五十里 虎峪鎮東六十里 傾城村東八十里 青家寨東六十里 寒湖鎮西四十五里 橫嶺鎮西八十里 儀城鎮西一百二十里 馬陵村西一百三十里 北安驛村南二十五里 南安驛村南三十里

石勒村北三十里 西石勒村北九十里 馬防鎮北九十里 松烟鎮

榆社縣

馬陵關西北八十里太谷縣界舊設巡檢司今廢 梁惠王三十年太子申與齊戰敗於馬陵徐廣曰在元城索隱按紀年云二十八年與齊田盼戰於馬陵又上二年魏敗韓馬陵十八年趙又敗魏桂陵桂陵與馬陵異處正義虞喜志林云馬陵在濮州鄆城縣東北六十里有陵澗谷深峻可以置伏按龐涓敗卽此也徐說馬陵在魏州元城縣東南一里龐涓敗非此地也按馬陵之役太子申過外黃見外黃徐子不聽其言而敗括地志外黃有南北二城在汴州雍邱縣界雍邱今開封府杞縣與濮州差近次則元城

而與今太谷榆社絕遠已於太谷志中辨之要之馬陵關自是太原遼州要疆殊不繫龐涓墓孫臏坡也 北有孫臏坡相傳孫臏伏萬弩處

黃花嶺西五十里舊設巡檢司今廢 漳河源出縣西北六十里黃花嶺

武鄉嶺東四十里接遼州界嶺下卽儀川河源

狗腰關南五十里接武鄉界

雲簇鎮西三十里步兵防守市集勝邑城

社城鎮西北三十里後漢涅縣晉改武鄉縣墉堞盡廢今爲

市鎮其途北通太原府西通太谷

魏城鎮南三十里偃武廢縣有遺址南通武鄉上黨通衢

箕城鎮東三十里唐箕州治此廢

沁州

交口堡北三十五里韓侍里

漳源鎮

交口鎮西北渡漳

源經走馬嶺乃武鄉界也繇此而權店龍舟峪麓臺團柏谷險道二里有奇鎮寔為縮轂口

段柳村南十五里陳柳里

段柳鋪南十里

宋太平興國

二年於銅鞮縣界亂柳石圍中建威勝軍以銅鞮武鄉二縣屬之唐天祐四年晉王李克用以蕃漢都指揮使周

德威為行營都指揮使壁於高河與梁拒戰及晉王病篤乃退營亂柳即今段柳村也周世宗時建雄軍節度使

楊廷璋前後率兵入太原境拔仁義高壁等砦獲刺史軍校數十人俘其民數千戶獲兵器羊馬數萬計并人棄沁

州二百里退保新城廷璋遂置保安興同白壁等十餘砦

是時沁州僑治沁源綿上間新城乃亂柳北城也顯

德六年夏楊廷璋率所部入河東界下堡砦十三降巡檢使靳漢晁等三人

常脚嶺東二十里武鄉道

聖佛嶺西五十里沁源道祝志南六十里沁源縣西北七十里

鳴蘓村西北二十里漢地理志闕與聚土人訛為鳴蘓通典有闕與故城漢韓信擒代相夏說於此闕與當以水

經注索隱括地志為正說詳和順故縣鎮西南四十里郭莊鎮在州北牛侍鎮西湯鎮胥

在州東北倪村在州東荆村在州東南花山寨東北三十里西峪寨西北六十里喬村寨西北二十五

里 段村寨西二十五里 堯神寨西南三十里 寺莊寨西南四十里 上執寨西南四十里 南仁寨西南四十五里 新店寨南三十五里 黃后寨西五十里 道興寨西南二十里 開村寨西二十里 南泉寨西南六十里 郭村寨西南二十五里 王可寨西北四十里 松交鎮 孫村在州西 沁源縣

綿上關北八十里綿上都 綿山北一百二十里盤踞百里連介休介山抱腹巖萬峯層踞澗壑杳邃冬雪入夏不消樵人嘗得冰蛆 綿上縣故城在北八十里綿山下即今綿上鎮也 明洪武二年置巡檢司後裁 水峪河在北七十五里源出水峪村至綿上鎮東入沁河 宋志綿上

縣寶元二年自大通監來隸威勝軍慶曆六年徙砦軍西北大覺寺地 金志綿上有羊頭山沁水 郭道鎮北少西六十里 仁霧山北五十里郭道鎮之東自綿山分脉而來綿亘六七十里突起高峯旁分兩臂彎環迴抱前胥起銳峯如雙闕中通一道沁河縈繞於外 滹河西北八十里源出靈石縣界太平頭石巖下三穴出水甚急至郭道鎮入沁河 隆慶元年九月俺答兵至郭道鎮而返

鵬巢嶺東南五十里接屯留縣境 縣志綿山鎮其北沁河繞其南鵬巢嶺踞其東霍太山峙其西 柴店關唐置今廢 唐志有柴店關今南路有柴則坪鐵冶柴則坪寨

保安寨城西紫金山明崇禎五年知縣范廷輔建以衛城

柏子鎮在西南叢山中近岳陽界

韓洪鎮在西少北

綿上堡 官軍鎮堡 霍登堡 興居堡 王莊堡 王和

堡 大色堡 王段堡 任家莊堡 石渠寨 下留寨

安樂館寨 侯壁寨 陽城寨 師莊寨 郭道寨

王鳳寨 定陽寨 蠡則峪寨

武鄉縣

南關西一百二十里 南關驛 涅源都南關里領村二十

有六中有南關三晉咽石板溝權店驛置勳歡護甲即古分水嶺

合渠南北二水至此合為一渠渠溝諸村 分水嶺在龍舟洞西一百

里護甲鎮洞水一源分為二派其一北流龍舟峪其一南

流繇權店驛至縣合漳水即涅水也 護甲山在西北一

百里一名侯甲其山有口即分水嶺涅水出焉 麓臺山在西

北一百二十里接沁源靈石祁平遙四縣境 陰廸在西

一百三十里南關鎮北兩峯對峙高出雲表山半一道裁

通往來護甲水繞其下昔人建立南關壘尚存 金武鄉

鎮一南關 王世貞適晉紀行午飯沁州又數十里小憇

舖舍大雨忽作轉入深谷中兩傍皆峭壁中通間道飛瀑

懸崖而下聲如轟雷計別取高嶺箭括一門十步九退時

時行絕磴間陽壁直上不可捫陰壑數十百丈大約如蜀

中左擔山之險抵一舖束燎而前凡數渡水河流砰湃噲

吟若擊數千鈺行里許復逶迤攀高嶺其峻陜視前更倍

勉上輒前蹄下輒後蹄又里許道差寬而權店驛候火亦

至抵驛將二鼓矣明日已稍晴乃發兩岸皆高山絕雲中為巨澗沿澗水而北崩峽東流峽皆石骨左道盡則渡而右右道盡復渡而左凡數十渡氣竭興亦盡未至南關驛大抵無非山者其中罅為澗澗傍稍高為道道稍有羨地則為市舍羨地稍寬而稍阜險則為城邑城邑之所不盡坡陀上下則為田 明隆慶元年俺答大入至南關而返

合祁縣龍舟峪觀之乃得其形勢之全

昂車關西北三里唐置今廢 漳川鄉下關村昂車關故址

漳水經此漳川鄉又有上關村 唐志北有昂車關 唐討劉稹河

東節度使劉沔將步騎二千守昂車關壁榆社又取石會

關

土河寨東七十里西南北三面阻絕深澗東面有墻今名土

河村

洪水鎮東七十里舊名橫水土音訛為洪水 唐討劉稹於昭義軍會橫水

戍兵叛入太原逐其帥李石奉裨將楊弁主留後事即此

地也 橫水戍莫詳處所鳳翔東十里夜叉河之說甚為

迂遠李德裕曰李相正以河東無兵故發橫水兵赴榆社

則縣志洪水鎮之說亦未慤核但洪水東北距墨鐙峯三

十里黃水自榆社北來鎮適據其衝而武鄉東境最延袤

自繫控制勝地

大界峽東八十里黎城界

故城鎮西北五十里古蔡臯狼地 涅城西五十里漢上黨

郡涅縣地後趙郡治今名故城城堞尚存 臯狼城西五

十里 自交口北至團柏谷子洪鎮大約皆古蔡臯狼地

智伯瑤求之將以制晉陽也故趙襄子不許鎮城特其南
原爾 故城鎮西十二里至權店驛

開豁口北十里榆社界

高嶺南二十里襄垣界

重城寨在墨鐙鎮石壁萬仞半崖一徑差可陟寨巔而草木
翳之不知其有寨也石竇清泉可以撤橋宴坐 墨鐙至
鍋窰嶺十二里遼州界

攀龍鎮東四十里東至大界峽四十里東北至鍋窰嶺六十
五里

重柵寨

一名岑彭寨

在縣東

墨鐙村

驢腦寨

一名馬武寨

監張

東二十里

韓壁寨東五十里

中多古寨

北馬樂村東二十

里 大曲鎮東七十里

段村西十里

南亭西十里

陽城地勢臨高面俯漳川古陽城縣地 石盤西九十里

信義西七十里

平定州

井陘關舊名井陘故關路通井陘縣卽漢韓信擊趙下井陘
口也明正統二年置故關巡檢司後裁 故關山州東九

十里兩山險隘關踞其中卽古井陘口北十里爲娘子關

甘桃口在井陘關南三里明築城建新固關設守禦千

戶所一員隘口有巡檢司地隸平定汛隸正定府 惡石

口在正定府城西自是西南一十五關口至故關 故關

在井陘縣西四十里共轄隘口三十六處 通典石艾東

有故關甚險固 正義井陘故關在并州石艾縣陘東十

八里卽井陘口 宋志平定軍有故井陘關柏井砦太平

興國二年以鎮州廣陽砦建爲軍

柏井城在州東五十

里漢韓信所築史稱未至井陘口三十里而舍卽其地也

唐長慶初裴晉公駐兵承天軍分兵置守 宋太祖開

寶中改置柏井寨命太子賓客殿中侍御史雲騎尉李溫

守禦 明嘉靖二十一年重修號柏井堡四面據河地勢

高二十丈方二里許東北隅樂平縣建倉糧草場以備客

兵芻餉 韓信擊趙駐兵於今平定州築城爲塞以榆塞

門遂名榆關卽州城上城也 試劍峯在州東二十里分

裂顛劍劈傳爲韓信駐兵試劍地 漢高帝三年十月韓

信張耳欲東下井陘擊趙趙王歇成安君陳餘聚兵井陘

口號稱二十萬廣武君李左車曰信耳乘勝遠鬪其鋒不

可當今井陘之道車不得方軌騎不得成列其勢糧食必

在後願假臣奇兵三萬從間道絕其輜重足下深溝高壘

勿與戰彼前不得鬪退不得還野無所掠不至十日而兩

將之頭可致於戲下否則必爲所擒矣成安君不聽韓信

使人間視知其不用還報大喜乃敢引兵遂下未至井陘

口三十里止舍夜半傳發選輕騎二千人人持一赤幟從

間道草山而望趙軍誠曰趙見我走必空壁逐我若疾入

趙壁拔趙幟立漢赤幟令其裨將傅餐曰今日破趙會食

諸將皆莫信佯應曰諾信謂軍吏曰趙已先據便地爲壁

且彼未見吾大將旗鼓未肯擊前行恐吾至阻險而還乃

使萬人先行出背水陣趙軍望見大笑平旦信建大將旗

鼓鼓行出井陘口趙開壁擊之大戰良久於是信張耳佯

棄鼓旗走水上軍水上軍開入之復疾戰趙果空壁爭漢

鼓旗逐韓信張耳信耳已入水上軍軍皆殊死戰不可敗
信所出奇兵二千騎共候趙空壁逐利馳入趙壁皆拔趙
幟立漢赤幟二千趙軍已不勝不能得信等欲還歸壁壁
皆漢赤幟大驚以爲漢皆已得趙王將矣遂亂遁走趙將
雖斬之不能禁也於是漢兵夾擊大破虜趙軍斬成安君
泚水上擒趙王歇諸將賀問曰兵法右背山陵前左水澤
今將軍反背水陣曰破趙會食臣等不信然竟以勝此何
術也信曰此在兵法顧諸君不察耳兵法不曰陷之死地
而後生置之亡地而後存乎且信非得素拊循士大夫也
此所謂驅市人而戰之其勢非置之死地使人人自爲戰
令子之生地皆走尚可得而用乎諸將皆服曰善非臣所
及也 水經注綿蔓水又東流逕樂陽縣故城西右合井

涇山水水出井涇山世謂之鹿泉水也東北流屈逕陳餘
壘而俗謂之故壁城昔在楚漢韓信東入餘拒之於此不
納左車之計悉衆西戰信遣奇兵自間道出立幟於其壘
師奔失據遂死泚上其水又屈逕其壘南又東逕城西東
注綿蔓 正義綿蔓水一名阜將一名回星自并州流入
井涇界卽信背水陣陷之死地卽此水也 綿蔓水一名
畢發在州東九十里娘子關平地突起下赴絕澗懸流千
尺號水簾洞卽井涇冶河之源也東至蒲吾入滹沱水卽
澤發水 元楊先韓淮陰侯廟記獲鹿舊有淮陰廟在土
門西道北岸上卽井涇口古戰處也 晉太元十三年慕容
垂遣鎮西將軍丹陽王纘龍驤將軍張崇出井涇攻慕容
永弟武鄉公友於晉陽九年五月克晉陽 後魏冠軍將

軍于栗磾潛至晉陽開韓信故道自井陘攻常山拔之
普泰元年八月爾朱兆率步騎二萬出井陘趨殷州李元
忠時鎮廣阿棄城還信都 隋末石艾人王君廓掠邯鄲
邯鄲人王君愕說曰井陘之險可先取君廓從之遂屯井
陘山 唐天復元年四月梁將葛從周入土門已巳敗北漢
後周顯德四年四月周李重進將兵入土門已巳敗北漢
兵於百井斬首二千餘級 宋開寶二年閏五月駕自太
原還戊辰駐蹕於鎮州 太平興國四年四月壬戌帝發
鎮州庚午次太原 明平定州志序平定太原支郡地稱
巖險四方有事塞井陘之口足以自固國家錯置州將直
隸後軍都督府有深意焉 嘉靖辛丑俺荅入太原候騎
薄其城下畿輔震驚守臣奏立新固關爲外拒於黃榆馬

陵諸關築長城數百里刁斗之聲相聞 故關教場在故

關內西山下 後唐同平章事馮道嘗戒明宗曰臣爲河

東掌書記時奉使中山過井陘之險懼馬蹙失不敢怠於

銜轡及至平地謂無足慮遽跌而傷凡蹈危者慮深而獲

全居安者患生於所忽此人情之常也 日知錄建武十

五年徙雁門代郡上谷三郡民置常山關居庸關以東

娘子關州東北九十里井陘關北十里卽古葦澤城相傳唐

平陽公主駐兵於此一說以妬女祠名大曆元年河東節

度使張開府築有胡伯成記今廢裴晉公征河朔駐兵於

此明嘉靖二十一年建城設百戶一員地隸平定州承天

都汎隸正定府 隋開皇十六年置葦澤縣屬并州唐貞

觀元年省入井陘 承天山東八十五里山形峭拔上有

老君洞 承天軍城東北八十五里承天山上唐建承天軍為太原恒山之界 葦澤城在井陘縣東北二十五里

金鎮二承天東百井 唐光化二年氏叔琮破承天軍

遂破遼州至榆次四月取澤潞 天復元年四月汴別將

白奉國破承天軍 五代趙王王鎔會晉王李存勗於承

天軍奉觴為壽存勗以鎔父友尊禮之酒酣為鎔歌拔佩

刀斷衣而盟許以女妻鎔子昭誨 明洪武二十四年廢

承天軍為砦 嘉靖二十二年復修為承天寨 桃水西

九十里出壽陽縣太平谷經州境至亂柳受南川嘉水會

石門河青玉峽至承天都合澤發水繇石峽東流入冶河

色如桃花一名桃江或曰即洮水 綿山東九十里娘子

關一名紫金山澤發水出焉 裴度老君洞題名鎮州四

面行營都招討節度觀察處置使為北都留守司空兼門
下侍郎平章事晉國公駐兵承天軍 曹命修守禦千戶
所記秦王翦漢韓信唐裴度五代漢祖劉暉皆統大軍駐
於平定

盤石關東北七十里一名石門口路通平山縣界 唐志廣

陽東有井陘故關東北有盤石故關葦澤故關

白城口東一百四十里路通贊皇縣界

厭谷口東一百四十里路通元氏縣界

西交口山武鄉縣界

黃土寨州西義井都 托天寨州西測魚都 北峯寨州西

新興都 禹家寨州南郭村都 廣陽寨州南廣陽都

東昌寨州南尚義都 梨園寨州南寧艾都 東峪寨州

南東郊都西郊舖 淮陰寨州東東會都柏井鎮 羅鍋
 寨州東營莊都 晉盤寨州東測魚都 青龍寨州北盤
 石都 移穰寨州北移穰都 卧虎寨州北白羊都 聖
 僧寨州北白羊都 秋村寨州北拒城都

壽陽縣

饑虎寨北三十里西張村四面壁立高十餘丈廣十四五畝
 井深十三丈北峙青龍寨相距裁十數武亦險絕

西張寨金興定四年從遼州刺史從宜行元帥府事郭文振
 請升壽陽縣西張寨為晉州

黃嶺西北五十里

黃嶺墩

嶺皆黃沙

明嘉靖九年十

月俺答南下蹂盂之方山等村至黃嶺界而還 崇禎十
 六年十二月叛將白光木率眾繇黃嶺抵宗義鎮次日官

兵追之未及鎮二里許至婁家坪為賊伏兵所敗次日復
 追至縣南賈卜坪大戰官兵復敗

東王坡西四十里上下崎嶇

捨身崖西六十里陡險

遂成鎮西七十里要羅山中明嘉靖十三年分巡僉事方日
 乾檄主簿牟嘉績建鎮今廢

渦山南八十里南接和順界

太安鎮西五十里為太安驛太安寨 張淨鎮東三十里

宗艾鎮北二十里 宗艾寨在北定二都廢 解愁鎮北

三十里 解愁寨在北定三都廢 雷公寨在雷公村

山南寨在東寧四都 景上寨在東寧五都 白馬寨在

南康一都 孤嘴寨在南康三都 燕竹寨在西安一都

清平寨在西安二都 狄那寨在西安三都 西塄寨在西安四都 孫家寨在西安八都 溫家寨在北定一都 獨北寨在北定三都 寨底寨在北定三都 長榆寨在北定三都 羊頭寨在北定四都 保安寨在北定七都 上峪寨在北定七都 孟縣

榆棗關東北一百一十里伏馬關東北四十里滹沱河所經路通平山縣古設關今廢土人名榆棗口繇縣北至五臺路省志縣東北四十里誤

伏馬關東北七十里舊名白馬關路通平山縣古設關今廢白馬山東北七十里東有白馬關 圖經白馬之山牧馬之水出焉 唐志孟縣東北有白馬故關 金志有白

馬山泉仇山滹沱水 元癸未河北西路都元帥史天倪徇山西遂克三關不浹旬定四十餘砦

六嶺關東北六十里路通平山縣 唐博野樂壽二縣介范陽成德間每交兵先薄二城故常為劇屯德宗以李寰守博野王廷奏叛二縣堅壁固守寰所領士隸右神策號忻州營牛元翼出深州寰亦引兵三千趨忻州廷奏邀之寰斬三百級追者不敢前後授橫海節度使討李同捷按軍不進乃罷忻州營博野趨忻州當繇孟縣

兩嶺山西一百二十里陽曲界山勢如畫當二邑東西之交二十里無聚落

十八盤關東北八十里平山縣界 中社北六十里

牽牛堡在牽牛山 牛村堡 杜村堡 洪塘堡 小坪堡

小湖堡 新莊堡 梁村堡 蔣村堡 郭秋堡 漢

戶堡 凌井村堡 蘭村堡 樓里堡 待賢堡 石假

堡 西烟鎮 西烟堡 城武村堡

樂平縣

黃沙嶺東一百二十里接贊皇縣界嶺東為九龍關 老人

峯東六十里踞黃沙嶺隘口 爾朱兆至廣阿齊獻武王

合遙授并州刺史李密募殷定二州兵五千鎮黃沙井陘

二道 竇建德援王世充命檢校并州總管劉世讓率萬

騎出黃沙嶺襲洛州 唐李諲承天寨記開府張公奉璋

於黃沙嶺築德化城 十八盤嶺贊皇縣西六十里山勢

嵯峨林木叢茂中有小徑縈紆上下有十八盤

鶴度嶺東九十里五代時北漢守險之地隘口有石城今隸

直隸臨城縣嶺東下高卑迥殊號為天險 一名仙臺又

名錦繡臺 元好問詩仙人臺高鶴飛度錦繡堂空去無

路人言馬嶺差可行若比黃榆猶坦步 喬宇詩更指西

南佳勝處太行青翠接中條 鶴度嶺在內邱縣西一百

七十里 漫天嶺在鶴度嶺北 麥穗嶺在漫天嶺東

鶴度嶺關在內邱縣西一百七十里山高惟鶴可度最為

險要仰面攻者弗克 錦繡堂關與鶴度嶺關相聯

馬嶺關東南一百里接邢臺縣界直隸設兵戍守 白巖山

麓踞馬嶺隘口乃北漢守險地也遺址尚存東接邢臺境

王雲鳳詩厚坤忽擁太行脊上倚青天纔一尺瀑布直

下三千丈六月時有冰花積鳴泉汨汨山翠微一泓不動

玻璃碧

馬嶺石橋

松子嶺南四十里接和順縣界嶺北有小松水又有松溪水

蘇祐詩高穿虎豹羣太行應絕頂 孫繼魯詩太行松

子嶺天作出羣山

靜陽村縣東北漢劉崇置砦以扼周師北控井陘漫天南控

黃沙黃榆 宋志樂平有靜陽砦 金鎮一淨陽

石人寨在臯村周二百步高七十餘丈山狹而盤旋下有大

石窰可容數百人繇窰門鳥道而上即寨也金元時閭甫

閻顯率鄉人避兵於此巖間一石若兩人相負因以名寨

安陽寨在北界都村 青花寨在野頭村 黑石寨在孔子

村 石龕寨在白陽峪口 寨裡鎮 店上鎮

忻州

忻口北五十五里兩山中夾滹沱水寔晉陽門戶萬曆二十

九年巡撫魏允貞用石甃堡險固可守 忻口諸山北五

十五里山甚多踞滹沱曲鎮堡在焉 玉箭崖忻口北東

岸俗名將軍背 忻口故城北五十里在忻口堡西半址

存相傳漢高祖自平城還師駐此築城水東有猫寨 宋

志秀容有石嶺關忻口雲內徒合四砦 通典忻州因忻

口為名 後周圍太原契丹救漢出忻代世宗遣符彥卿

拒之以史彥超為先鋒戰忻口彥超左右馳擊解而復合

者數四遂歿於陣世宗遽班師 遼應曆時周人侵漢以

南院大王撻烈都統西南道軍援之周已下太原數城漢

人不敢戰及聞撻烈兵至周主遣郭從義尚鈞等率精騎

拒於忻口撻烈擊敗之獲其將史彥超周軍遁歸復所陷

山西通志 卷十五 城邑

雲內口西七十里龍門山北雲中水所經也宋孟良常守此
明初巡檢朱德亮守之亦名寨西隘口西至蒲閣寨通靜
嵐石隰等路北至沙溝寨通寧化寧武等邊嘉靖三十四
年吉囊自寧化等處寇太原由此北出即雲內鎮一名雲
內堡 省志寨西隘口乃雲內鎮也一名雲內堡忻州西
北明洪武間置巡檢司後裁

孟良城西北七十里蒲閣寨東又雲內口東有教場址存

石嶺關南四十里界陽曲縣設巡檢司 通考秀容有石嶺

關 定襄石嶺關甚險固 六郎城南四十里石嶺關北

宋楊延昭駐兵於此

赤塘關西南五十里路村一都東南入省城 唐赤塘關屬

陽曲 金石嶺關專屬忻州 雲內赤塘一帶西南直通

晉陽 東高西高二堡州治西北六十里地皆平衍唐宋

戍石嶺赤塘二關郡置防禦團練使明不設兵嘉靖庚申

俺荅由寧武諸口入犯忻口迤西東高西高等都一帶平

衍騎渡沙河直抵郡城入雲內口過赤塘直抵省會 赤

塘谷西五十里白馬山谷即五代時劉赤塘所隱也

白馬山西南六十里北連大嶺山西南界靜樂 遼保寧初

宋圍太原以北院大王耶律屋質率兵往援至白馬嶺遣

勁卒夜出間道疾馳駐太原西鳴鼓舉火宋兵以為大軍

至懼而宵遁 北漢廣運六年三月遼乾亨元年也南府

宰相耶律沙援北漢與宋將郭進遇於白馬嶺時遼兵阻

大澗沙與諸將欲待後軍至而戰冀王敵烈監軍抹只等

以為急擊之便沙不能奪敵烈等以先鋒渡澗未半為宋人所擊兵潰敵烈及其子蛙哥沙之子德里突呂不部節度使都敏黃皮室詳穩唐筈等五將俱沒士卒死傷甚眾會南院大王斜軫兵至萬矢俱發敵軍始退

牛尾莊巡檢司西南百里 [牛尾莊寨在忻州西南九十里

白馬山西南路通靜樂縣界明洪武七年置巡檢司

沙溝寨西北七十里洪武間置巡檢司

貓寨北五十里白村里忻口東極險元設戍兵明正統末也先入石巨射退四十七騎寨獲全

雲中山西北八十里與雙尖山連北界崞縣

大嶺山雲中山西二十里北連崞縣黃崑山西界靜樂

虎頭山寨遊邀堡胥東南二十里 代郡堡東北三十五里

三交堡西六十里 魏家溝寨王家寨胥西七十里

蔡尖寨西七十五里 高崖寨西南七十里 麻會鎮堡

南二十里 關城堡南四十里 上下關峪二堡西四十

里 米家寨西北六十里 南高寨西北五十里 部落

堡北五十五里 吳家堡北四十里 高村屯堡東北四

十里

定襄縣

蔣村東北二十里滹沱河北有蕎麥寨勢極峻聳隔河南對

神山寨與玉池灣胥要地 明嘉靖末俺答破蕎麥寨

神山寨東北十五里滹沱河南壘石山嶺北對蕎麥寨

虎頭山西南三十五里西接石嶺關以形似名

段木山東北四十里接大關 明嘉靖四十年土賊夜藏段

木山晝出擄掠兵巡道王喬年及常參將設計誘之夜發
兵擒獲四十餘人餘黨解散

開門峪東南十五里一山中分相對如門 今孟縣故城名
自開城相傳趙盾射龍於此

龍頭山西北三十五里滹沱河水經其旁對水西忻口鎮
玉池凹南三十里孟縣宋莊界

叢蒙山南二十五里羣峯聯絡山尤聳峙
上湯頭村山寨西北三十里崞縣板市界

卧虎山北三十里

青石村土寨東北三十五里五臺東冶村界

五石峪山東二十里

十八盤山東三十里盤旋而上一十八轉接五臺大關

窰頭山東南二十五里上有羊腸產石炭

東酈村堡東十里 劉暉村山寨東南十里 南王村山寨

東南十五里 張村堡南十里 鐔村堡南十里 智村

堡西南十五里 長安村堡西十里 藍臺村堡西十五

里 向陽村堡西北三十里 橫山村甄堡北三十里

鎮安村堡東北十五里 砂村山寨東北二十五里 芳

蘭村堡東北三十里 牛臺村堡東北三十里 芳蘭鎮

中霍村 橫山村 南受羅村

靜樂縣

兩嶺關東六十五里土城周三百五十步高一丈一尺 兩

嶺山高五里盤踞四十里兩山相對面北北嶺面東南東

至石莊北至忻州界西至固鎮乃管涔山東北枝轉南折

北之兩脊也西北諸郡並榆林寧夏取道焉 明初調太

原左衛官軍又置巡檢司守之洪武八年移巡檢司於順

水村今在故鎮 兩嶺隘在縣東南六十里南通陽曲縣

鹿徑嶺關西六十里嵐縣界路通岢嵐舊置巡檢司後裁

鹿徑嶺山一名鹿西六十里蘆芽西出枝南度者在嵐縣

界 趙吉士議據管涔鹿徑則宣大河保隔而為二而偏

頭寧武直拊其背而扼其吭 洪谷岢嵐洪谷即今鹿徑

嶺道也詳岢嵐

娑婆嶺隘東八十里土城如兩嶺明初調太原左衛兵守之

洪武七年置巡檢司後司移天門關 娑婆隘西五十里

有馬家會隘口 東北十里有石神嶺隘口通忻州界

西北三里有橋門嶺隘口 東南十餘里有楊寨溝隘口

南十里有懸鐘嶺隘口通忻州牛尾寨

樓煩鎮南七十里東臨汾水西抵周洪山通交城縣本宋金

縣也元改置巡檢司明因之洪武二年建樓煩巡檢司舊

稱副巡檢以土人為之 樓煩城南七十里址存 通考

憲州本樓煩監牧嵐州刺史領之唐貞元十五年別置監

牧使 隋煬帝十一年秋九月自雁門郡入樓煩關以還

唐樓煩郡東南去理所二百五十里兵三千人 唐北

有樓煩關 宋白續通典憲州故樓煩監牧 唐昭宗龍

紀元年李克用表置憲州北漢因之領縣三 樓煩 元池 天池

宋咸平五年以州地卑隘多水潦移治靜樂軍之靜樂縣

遂廢軍又廢天池元池二縣入靜樂非今樓煩鎮也

故鎮巡檢司洪武八年置

風溝堡 武家莊 甄堡 下馬城堡 高家堡 桑園堡

巾字山堡 磨管峪堡 鳳凰山寨 北馬房屯寨 西

馬房屯寨 龍和寨 任家村寨 南樓煩鎮 閻市崖

天城店 西馬房鎮 北永安鎮

代州

雁門關古勾注東西陁之地雙闕斗絕雁度其間故名 古
有雁門關明洪武七年置代州振武衛轄六千戶所即代
北四十里置關仍置守禦所景泰元年以都御史提督關
務後用山西巡撫兼之關外大石墻三道小石橋二十五
道北為廣武站轄隘口十八東為水峪為胡峪為馬蘭為
茹越為小石為大石為北樓為太安為團城為平刑西為
太和一名白草溝為水芹為吊橋為廟嶺一名夾柳樹為

石匣一名鵬窩梁為陽武峪為元岡為蘆板口胥有堡

正德十一年都御史李鉞於雁門東築七堡石墻吳城六

郎以遏山陰之衝東梁坡亂石灘駱駝石以遏應州之衝

天井梁以遏渾源州之衝雁門西築四堡八岔石匣小蓮

花以遏馬邑之衝夾柳樹鵬鶚梁以遏朔州之衝 嘉靖

十九年都御史劉臬請城雁門隘塞三百里高闊以一丈

五尺為式掣回大同協守班軍分戍十八隘雁門平刑盤

道梁為阨塞繇雁門東顧則平刑西顧則盤道梁介乎東

者則水峪胡峪馬蘭茹越小石大石太安團城凌雲葫蘆

焉介乎西者則太和白草八岔小蓮夾柳燕水鵬窩元岡

焉是所名十八隘也自宋有之而州西二十二里陽明堡

正走晉陽道都御史許守謙兵備張惟誠砌築甄石為內

助之險 野史代城之北層巒疊嶂四十里至雁門節節高上直在雲端關外卽古沙漠地二十里至廣武站視關又在十里之上卽宋楊六郎屯兵故址烽墩鱗鱗俱在嘉靖時吉囊從寇家梁入犯忻州崞縣一帶蓋寇之行必於山巔高阜處故名山脊曰梁萬曆三十三年巡撫李景元爲築牆之議綿亘十五里堅固精好外護雁門內鞏省會寇不敢窺焉 楊六郎寨雁門關北口東山上隸馬邑縣在縣南五十里其西五里有佳吉寨 傅家坪土橋石橋皆在雁門關 三關志雁門封山表郡舊矣十八隘自宋有之宋失山後以此爲防 山西之關四十有餘皆踞隘保固而聳拔雄壯則雁門爲最 喬宇雁門山記午上關折西躡高嶺絕頂四望則繁峙五臺聳其東寧武諸山帶

其西正陽石鼓挺其南朔州馬邑臨邊之地在其北 鄧亨疏代州雁門關西抵寧武偏頭東連紫荆倒馬逼近朔州威遠爲京畿之藩籬作山西之屏垣自正統景泰年間以來也先俺答節從雁門關東茹越等口入寇直至忻州繁峙五臺等州縣考之郡志亦云外遼羣山中開平壤自古戰守之區論之目前則偏頭寧武地方之要害相爲甲乙圖之深遠則代州雁門關隘之緊關尤當注意

雁門守禦千戶所在布政司北三百六十里東至水峪口代

州界二十里西至盤道梁堡三十里南至代州界三十里

北至廣武城二十里東南到代州治 爾雅八陵西俞雁

門是也 郭璞曰卽雁門山 山海經雁門者雁飛出於其間 呂氏

春秋雁門九塞之一 五朝志雁門有關官有長城有纍

頭山有夏屋山 通典雁門郡南二十里有東陁關甚險
固 唐志雁門有東陁關西陁關 宋志雁門有西陁胡
谷雁門三砦 金志雁門有夏屋山雁門山滹沱水鎮三
雁門西陁胡谷 趙武靈王北畧中山至於房子遂之代
北至無窮登黃華之上召樓緩謀彊兵 趙將李牧常居
代雁門備邊以便宜置吏市租皆輸入幕府爲士卒費日
擊數牛饗士習騎射謹烽火多間諜約曰寇卽入盜卽入
收保有敢捕虜者斬寇每入烽火謹輒入收保不敢戰如
是數歲亦不亡失然寇以牧爲怯趙王讓之牧如故乃使
他人代將出戰數不利復請牧牧曰王必用臣臣如前乃
敢奉令王許之牧至如故約邊士日得賞賜而不用皆願
一戰於是乃具選車得千三百乘選騎得萬三千匹百金

之士五萬人悉勒習戰大縱畜牧人民滿野寇小入佯北
不勝以數千人委之寇大率衆來入牧多爲奇陣張左右
翼擊大破之殺十餘萬騎滅襜褕破東胡降林胡單于奔
走其後十餘歲不敢近趙塞 漢元光元年十一月中尉
程不識爲車騎將軍屯雁門 五年發卒萬人治雁門阻
險 六年遣驍騎將軍李廣出雁門失道而還 元朔元
年三月寇入雁門敗都尉殺畧三千餘人遣將軍衛青出
雁門獲首虜數千級 北齊河清二年周師及突厥至并
州望齊軍營甚整突厥咎周人曰爾言齊亂故來伐之今
齊人眼中亦有鐵何可當耶乃還至陁嶺凍滑鋪氊以度
馬寒瘦膝已下皆無毛比至長城死且盡截稍杖之以歸
隋大業十三年雁門丞陳孝意奔還雁門雁門人殺之

以城歸劉武周 唐大曆十三年回紇襲振武攻東陁入
 寇太原河東節度使鮑防與戰於陽曲敗績代州都督張
 光晟又戰於羊虎谷破之寇乃去 宋宣和七年十二月
 金粘沒喝由雁門趨太原所過皆陷 明景泰元年刑部
 右侍郎江瀾督修雁門關 雁門關巡檢司

國朝雍正四年設

廣武城在布政司北三百八十里東至茹越口堡九十五里
 西至朔平府馬邑縣界二十里南至代州六十里北至大
 同府應州界十里 雁門關守備初駐代州嘉靖二十三
 年移駐廣武城 廣武西二十里至太和嶺太和二十里
 至水勤口水勤二十里至弔橋嶺弔橋三十里至廟嶺廟
 嶺三十五里至石匣口石匣十里至陽武峪陽武二十里

至元岡口元岡三十里接寧武關之蘆板寨 廣武東十

五里至水峪口水峪三十里至胡峪口胡峪二十里至馬

蘭口馬蘭三十里至茹越口茹越三十里至小石口小石

十里至大石口大石四十里至北樓北樓五十里至太安

嶺太安五十里至團城口團城五十里接平刑關之平刑

嶺 廣武城東橫背嶺又東為葫蘆口又東為凌雲口又

東為水峪口廣武城西為太和口又西為白草口又西為

八岔口 廣武墩南十三里至雁門北口北口十里至雁

塔雁塔十里至南口南口十里至代 廣武北傳烽渾源

州繇山南孤山墩應州繇山南羊腦墩山陰縣繇山南圪

塔墩而傳崞忻州北則由蘆板東則繇代柏林崖至班聶

三關志廣武當朔州馬邑大川之衝通忻代崞峙諸郡

縣之要道凡由大同左右衛而入勢當首犯東越廣武則北樓平刑皆敵衝也西越白草溝則夾柳樹鵬窩梁皆要害也雁門警備於是為急嘉靖二十一年七月俺答糾青台吉呪刺哈哈刺漢及叛人高懷智李天章等寇廣武南掠太原抵平陽韓信嶺乃還

白草溝 勾注山在州西北二十五里一名西陁上為太和嶺後為白草溝即廣武舊站通雲中 史記正義代州雁門縣有勾注山 勾注陁 勾注山之仄漢高帝自晉陽至平城繇此越代谷 水經注陁山南北有長嶺嶺上東西有通道即鉞鐙也 魏勾注碑北方之險有盧龍飛狐勾注為之首 括地志勾注山一名西陁山夏屋山一名賈屋山在雁門縣 蘇厲遺趙王書秦反至分先俞於趙徐

廣曰爾雅曰西俞雁門是也正義曰至音那分字誤當作山字括地志云勾注山一名西陁山在代州雁門縣西北四十里俞音戍郭注云西陁即雁門山也按西先聲相近蓋陁山西陁二山之地並在代州雁門縣皆趙地也 穆天子傳北巡至於鉞山之隊東升三道之陁獵於山北大風雨雪作黃竹之詩以歸 金志縣有西陁鎮

廣武故城州西十五里陁口之南即漢械繫婁敬地 廣武城在馬邑縣南八十里韓王信與匈奴屯廣武以南漢兵大破之即此漢為縣屬太原郡 雁門廢縣州西北四十里即漢廣武縣隋改雁門有東西陁二關今廢 漢平城廢縣在雁門縣之西 括地志廣武故城在代州雁門縣勾注山南四十五里 通典廣武縣故城在雁門縣西南

有勾注山一名西陘山 舊唐志漢廣武縣隋爲雁門縣
明一統志廣武故城在代州西一十五里 漢營陰館
卽今治魏徙雁門治廣武今州西故城尋還陰館營上館
城 漢高帝七年十月右賢王將萬餘騎與王黃等屯廣
武以南寇晉陽將軍周勃酈商夏侯嬰破之追至離石定
雁門樓煩諸縣夏侯嬰三陷陣 漢文帝後四年寇大入
雲中代屯勾注後五年寇三萬騎入雲中故楚相蘓意爲
將軍屯勾注 應劭曰山險名也在雁門陰館 魏牽招
爲雁門太守鮮卑步度根泄歸泥等將部落三萬附塞招
自將歸泥等討軻比能於雲中故郡大破之招通河西鮮
卑附頭等十餘萬家繕治陘北故上館城置屯戍以鎮內
外 晉咸和三年趙石虎以五千騎伐代代王紇那戰於

勾注敗績奔大寧 元魏皇始元年八月自將兵四十萬
南出馬邑踰勾注燕并州牧遼西王農棄城遁并土悉降
武定元年八月齊獻武召夫五萬於肆州北山築城西
自馬陵戍東自土陘四十日罷 周保定四年正月伐齊
元帥楊忠以突厥衆壞齊長城而入席卷三十餘鎮齊人
守陘嶺之隘忠擊破之留其裨將楊纂屯靈邱以爲後拒
而自以兵攻晉陽不利引還纂亦解歸 隋大業十一年
八月北巡始畢勒騎四十萬謀來襲義成公主遣使告變
乃疾馳至雁門始畢兵亦至圍雁門城中兵民十五萬食
止支二旬諸屬城皆破惟崞城守始畢急攻雁門矢及御
前蕭瑀請諭將士不復東征高麗厚爲賞格且使人於義
成公主以詔書繫木浮水以出徵兵從之九月唐公李淵

子世民應募說屯衛將軍雲定興曰始畢以我倉卒不能
赴援宜晝引旌旗夜鳴鉦鼓必謂我救兵大至不戰遁矣
定興從之會義成公主亦使使告始畢曰北邊有急乃解
圍去遂入樓煩關以還 按魏徙雁門郡治廣武今廣武
廢縣也郡尋還陰館隋開皇五年改廣武曰雁門縣卽魏
所徙郡治今廣武舊站也 唐武德二年始畢可汗佐劉
武周以五百騎入勾注 宋太平興國五年三月契丹十
萬騎入雁門代州刺史楊業率麾下數百騎自西陁出由
小徑至雁門北口南向背擊之大破契丹殺其節度使駙
馬侍中蕭咄李自是見業旌旗輒引去 雍熙三年三月
都部署潘美自西陁入與契丹兵遇追至寰州破之神衛
軍都校薛超從潘美北征至雁門西陁路與遼師遇敗之

斬首五百餘級超連被創血濡甲縷部分軍士自若 熙
寧七年沿邊增修戍壘起舖舍雁門以北稍侵入蔚應朔
三州界遼遣使來言疆事詔太常少卿劉悝境上會議八
年春遼使蕭禧來會於大黃平議不能決初遼指蔚朔應
分水嶺土壠爲界及行視無土壠乃曰但以分水嶺爲界
凡山皆有分水無可指據遼復遣蕭禧來致圖書詔知開
封府韓縝代悝復遣知制誥沈括先報聘括詣樞密院閱
故牘得頃歲所議疆事書指石長城爲界去今所爭黃嵬
山三十餘里言之帝喜曰大臣殊不究本末幾誤國事括
至遼遼相楊益戒來就議括得地訟之籍數十以應之遼
知不可奪遂舍黃嵬而以天池請括還王安石進曰將欲
取之必固與之於是詔縝割地畀遼東西失地凡七百餘

里其後遼復包取兩不耕地下臨雁門遂起用兵之釁時
提點河東刑獄蔡廉上言不可失要險起寇心不聽 兩
鎮三關志北方之險盧龍飛狐勾注爲之首宋之立國不
競於岐溝之戰未能復盧龍不勝於陳家谷之師未能復
飛狐茲又無名捐此不能全勾注譬之防川堤障悉淪何
以遠溺故嘗曰宋之南渡不在於汴京之括金而在於分
水嶺之畫界宋之遂亡不在於瓊崖之覆舟而在於襄鄧
之失守 尹耕宋割分水嶺論夫地險有二山水是也水
險主客共之山險主可專利宋人所割分水嶺之地今不
可考然嘗登雁門踰夏屋極目於勾注廣武之間而知陘
山形如人字一脊中分山南據脊則利歸山南山北據脊
則利歸山北遼人所以拳拳於此也 金朔州鄯陽縣有

桑乾河太和嶺天池雁門關霸德山而代州雁門縣有夏
屋山雁門山有雁門西陘胡谷鎮是雁門勾注之險分隸
朔代元破野狐嶺軍所以易於長驅深入也 元戊寅木
華黎自西京由太和嶺入河東攻太原忻代澤潞汾霍等
州悉降之遂徇平陽 金興定二年八月己酉元遣木華
黎等帥步騎數萬自太和嶺徇河東乙卯收代州己卯十
月復由雲中歷太和寨入葭州 元大德五年興屯田於
太和嶺之間分山陰雁門馬邑鄯陽洪濟金城寧武七屯
韓安國曰孝文帝嘗擁天下之精兵聚之廣武常谿
三關志雁門郡治廣武井水鹹苦民擔輦遠汲往返七里
漢建興四年魏雁門太守牽招準望地勢因山陵之宜開
廣武渠注水城內甚得其濟

峪口州南東西二峩之中南入五臺界 [峩嶺] 曲徑通微盤折而上越嶺復盤折而下五里至五臺白崖村

峩口州東南六十里接繁峙界有峩口寨堡 西二十里有黑山寨堡

水峪口廣武站東十五里 翁萬達疏自水峪鴉兒崖起東至馬蘭口霍家坡止為垣五十三里有奇增添敵臺九十

六舖屋二百八十八品窖五萬四千八百四十 胡峪口水峪口東三十里

葫蘆口廣武橫嶺背東 橫嶺盤道勢最糾結故明時垣工最詳

凌雲口葫蘆口東北少東南至水峪口 翁萬達疏自凌雲口菜樹溝起東至大安口閻家嶺止為垣四十五里有奇

石塹三十之一增添敵臺一十八舖屋五十四自凌雲口黃沙坡起東至大安嶺盡境及葫蘆頭橫墻地止為垣二十丈五尺削崖垣二里有奇增添敵臺五十四舖屋一百二十六品窖六千九百二十四

馬蘭口凌雲口少西北錯繁峙應州界 翁萬達疏自霍家坡起東至凌雲口黃沙坡止為垣四里有奇增添敵臺八十一舖屋二百四十三品窖七千九百

七里堡西七里 馬站堡西十五里 古城堡西十五里

八里堡西二十里 窰子頭堡西二十里 陽明堡西二十里

十二里 茹解堡西三十里 平城堡東五里 二十里

舖堡東二十里 門王堡東二十里 聶營村堡東三十里

里 下社村堡東四十里 梨園堡南七里 下田堡西

山西通志 卷十五
北七里 上田堡西北十五里 花家村堡西北二十里
宇文堡西北二十里 常河堡西北二十里 官園堡
西北三十里 磨方堡東北十五里 薄村堡東北十五
里 赤土堡東北二十里 馬村堡東北三十里 三家
村堡東北四十里 望台堡東北四十里 鹿蹄澗堡東
北四十里 胡峪堡東北六十里 高村堡東南八里
金盤村堡東南十里 選仁村堡東南十五里 下庄村
堡東南十五里 東帳村堡東南二十里 黑山庄堡東
南四十里 堡子土堡西南十五里 趙村堡西南二十
里 徐村堡西南二十里 閻村堡西南二十五里 白
水堡西南十七里 下茹解堡西南三十里
五臺縣

石盆口縣東十五里爲茹村繇茹村而東至石盆洞口繇石
盆洞口入東北一谷爲上峪袤四十五里路通高洪口臺
懷鎮射虎川長城嶺繇石盆口南爲下峪一水中流兩山
夾岸路南通牛道嶺東南通黑山關 石盆口東山有柏
寨有石盆溝 北漢天會十一年三月招收指揮使閻章
以石盆砦詣宋鎮州降

高洪口東南七十里南連石佛口北接大峪口路通阜平縣
關口山明洪武九年置巡檢司 上峪北山下爲河口村
虎陽河清水河匯此又上爲高洪口又渡河北至松巖村
入峪四十五里至是少平 高洪口巡檢司今寓城中

長城嶺由高洪口沿河至石嘴村北進則臺懷鎮又繇石嘴
北上過紅崖爲射虎川又北鐵鋪村過盧家莊子東上二

里至長城嶺直隸龍泉關界 龍泉關東臺東南六十里
大峪口東北五十里福勝都東通阜平縣西通崞縣北通繁
峙縣明永樂八年置巡檢司今裁 縣東北四十里爲竇
村鎮繇鎮東少北至南道頭又東至大峪口又東北至香
域溝夾道山泉多虎豹又盤山而入至繁峙縣界西瓦梁
飯仙口東北一百二十里明永樂九年置巡檢司今裁 西
南二十里有狐野口又西北二十里有趙勝口
石佛谷東南五十里百蘭都

黑山東南九十里接平山縣界山東爲黑山關 小峪兩山
夾水一日度河者數十至耿家莊蓮花盆東入一谷翳林
飛瀑爲懸鐘堂又過砂崖呂家莊至黑山關 自黑山關
下抵縣城百里澗繞山行水流透曲卽東峪溝也 油盆

池在黑山下

摩天寨東北九十里峭壁插天高二十餘里上平地數頃可

馳射

摩雲山

唐末蒲絳民避亂五臺壁摩雲山羣賊

往攻不克李罕之以百人攻拔之衆號李摩雲

曹寨南七十餘里峻峭拔起四面石壁滹沱繞其下

國朝順治六年姜賊據之總兵李延壽募壯士登寨軍中夜
先擊鼓以亂賊之聽乃鑿石下鐵椎如猿狖攀援而上賊
不爲備遂破

竇村鎮

國朝順治六年姜黨穴竇村鎮宣府總兵李延壽聲言牧馬
代州刻期繇峩口進兵出賊不意夜驟馬竇村賊驚遁縱
擊無一脫者五臺圍解

臺懷鎮康熙五十二年設營墩汎三隸縣地餘隸繁峙

金剛庫康熙五十二年設營墩汎四

水月堂寨東北七十里上如覆甌下如壁立 元黃寨豆村

山東山高峻 揚武寨東四十里險峻 抓髻寨南三十

里 狐突寨南四十里 槐陰堡立崖上 東冶堡 東

峽堡 高家莊堡 稽頭堡 建安堡 河邊堡 兩澗

堡 泉巖堡 郭家寨堡

繁峙縣

茹越口堡北六十里明正統十年築在布政司東北九十三

里東至小石口堡二十里西至廣武城南至繁峙縣六十

里北至大同府應州四十里 應州南三十里為茹越北

口龍灣山南四十里為茹越北口 宋志有繁峙茹越六

石義興治寶興軍瓶形梅回麻谷八砦 金志繁峙縣有

茹越鎮 後唐末詔應州修茹越口 遼以雲州為西京

則茹越之路自通 明正統十四年九月瓦剌繇茹越口

入掠忻崞繁峙五臺

小石口堡東北八十里明正德十一年築在布政司東北四

百一十里東至北樓城三十里西至茹越口堡二十里南

至繁峙縣四十里北至大同府靈邱縣界二十里 應州

東南三十里大石口同 小石峪北二里有大石峪水隸

應州小石峪有小石峪水隸應州

大石口堡東北八十里明正德十一年築 宋端拱元年遼

人自大石路南侵知代州張齊賢預簡廂兵千人為二部

分屯繁峙崞縣下令曰代西有寇則崞縣之師應之代東

有寇則繁峙之師應之比接戰則郡兵集矣至是果為繁峙兵所敗 宋張耆言契丹雲應蔚朔四郡間遣人以文移至并代非觀邊虛實即欲察識道路宜密諭代州自雲應蔚至者繇大石口入自朔至者繇土陞入餘間路塞之以示險 金志繁峙縣有大石鎮

北樓口城東北一百一十里布政司東北四百二十里東至平刑關六十里西至小石口堡三十里南至繁峙縣界四十里北至大同府廣昌縣界二十里 明正德十一年城北樓諸堡凡十有一并設北樓倉 北樓北口在應州東南四十里 北樓口南通朗嶺關 嘉靖二十三年置游擊將軍別為營駐北樓口 三關叅將守備分駐北樓口各一員 唐武德七年頡利願欵北樓關請互市上不之

拒 胡松荅翟中丞書雁門守備雖帶管其地然設在代州勢難遙制且代城甚堅其中固有代州振武衛與按察分司自足捍禦宜改置北樓口使備東十隘 王家屏三邊修守記甃二城北樓廣武增築土堡六古計砂澗福連房大營屯黑圪塔中莊

朗嶺關 舊名狼嶺 東一百里應州南四十里路通應州界振武衛

守備關下有馬跑泉

平刑關東一百三十里路通靈邱縣 一名甌形雁門關東二百三十五里路通靈邱縣西北連渾源州大寨口南接正定府阜平縣界 平刑營在布政司東北五百里東至直隸阜平縣界三十里西至繁峙縣一百三十里南至直隸阜平縣界十八里北至大同府渾源州一百二十里

大寨頭關在渾源州西南一百一十里 明設守備一員
 百戶一員征操馬軍五百名守堡旗軍一百八十四名
 金志繁峙縣有瓶形鎮 宣府鎮摘兵三千在平刑關駐
 劄專應援吳王口別鎮兵三千在廣昌縣駐劄專應援浮
 圖峪插箭嶺等處 嘉靖二十三年巡撫都御史曾銑議
 大城雁門長城自老營了角山至平刑關東八百餘里
 楊博據要害疏大同則當守渾源靈邱廣昌銀釵驛馬等
 嶺協同保定鎮巡固守紫荆倒馬馬水口等處使不能越
 關而南山西則當守陽方神池老營堡偏關等處使不能
 越關而西其五臺繁峙平刑設在關外尤當一體戒嚴
 明設平刑軍站去砂澗驛太白驛各七十里
 平刑關巡檢司雍正九年巡撫石麟 題請繁峙縣平刑關

距縣治一百三十里路通直隸深山曲徑甚屬險要應裁

平刑倉大使設平刑關巡檢專司巡緝兼理倉務

馬蘭口西北六十里代州應州界 翁萬達疏自馬蘭峪起

東至平刑關止為垣三十九里塹十之一增添敵臺五鋪

屋十五品窖一萬六千九百四十五

車道場口北樓營迤東南

太安嶺北樓城迤東東至鷓子澗溝十五里迤東接平刑營

汛南至大營堡三十二里西至下角峪石罅嘴三十里迤

西接北樓營汛北至石罅嘴二里迤北接渾源營汛 翁

萬達疏自太安嶺起東至平刑關三嶺子盡境止為垣七

十三丈增添敵臺八十九鋪屋一百六十七品窖一萬四

千七百四十八

臺懷鎮大名烟西六十里至峩口接代州東路汛 獅子窩

東至金閣嶺墩接五臺縣地

東城嶺在縣西南

峩嶺東南五十里越嶺至五臺大柏鋪

西瓦廠村縣南五臺界繇東瓦廠村上金嶺入臺山

故縣堡 三泉堡 砂澗堡 太白堡 楊興堡

崞縣

夾柳樹堡西北六十里明正德十一年築 盤道口宋土陞

砦宋志崞有蘆板陽武石峽土磴四砦 張耆言契丹文

移自朔至者宜繇土陞入以示險 唐武德中上問劉世

讓以備邊策答曰突厥數南寇者恃有馬邑爲地耳如使

勇將屯崞城厚儲金帛以招降者數出奇兵畧城下踐禾

稼不踰歲馬邑可圖也上曰非公無可任者乃使馳驛經

畧於是世讓至馬邑高滿政以地來降 宋雍熙三年十

二月代州副部署盧漢贇敗契丹於土陞堡 雍熙中代

州楊業戰没上訪近臣以策齊賢請行卽授給事中知代

州與部署潘美同領緣邊兵馬是時遼兵自胡谷入寇薄

城下神衛都校馬正以所部列南門外衆寡不敵副部署

盧漢贇畏懦保壁自固齊賢選廂軍二千出正之右誓衆

慷慨一以當百遼衆遂却先是約潘美以并師來會戰無

何間使爲遼人所得齊賢以師期旣漏且虞美衆爲遼所

乘旣而美使至云師出并州至北井得密詔東師敗績於

君子館并之全軍不許出戰已還州矣於是遼兵塞川齊

賢曰賊知美之來而不知美之退乃閉其使密室中夜發

山西通志 卷一五
兵二百人持一幟負一束芻距州城西南三十里列幟燃芻遼兵遙見火光中有旗幟意謂并師至矣駭而北走齊賢先伏士兵二千於土磴砦掩擊大敗之擒其北大王之子一人帳前舍利一人斬首百級獲馬二千器甲甚衆翁萬達疏自夾柳樹西界小西溝起東至水峪口鴉兒崖止爲垣十五里增添敵臺一百舖屋三百 盤道口堡布政司北三百七十里東至雁門所三十里西至陽方口堡六十里南至崞縣七十里北至朔州六十里

陽武峪西南六十五里 陽武堡有楊六郎寨 秦太子扶蘇軍於此有太子崖 唐大曆十三年代州都督張光晟擊敗回紇於陽武峪 後唐清泰三年遼太宗繇陽武峪入雁門抵太原敗唐兵 宋都巡檢使楊延昭守陽武峪

驍勇善戰遼人憚之時部將孟良焦贊同守焉 嘉靖二十年七月俺答由左衛豬兒窰入掠馬邑朔州遂入陽武峪抵太原 明正德間崞縣閻俊自陽武峪抵寧武關沿山鑿石架橋 宋左拾遺張齊賢疏自河東初下臣知忻州捕得遼納米典史皆云自山後轉盤以授河東以臣料遼能自備軍食則於太原非不盡力然終爲我有者力不足也河東初平人心未固嵐憲忻代未有軍砦入寇則田牧頓失擾邊則守備可虞及國家守要害增壁壘左控右扼疆事甚嚴恩信已行民心已定乃於雁門陽武峪來爭小利此其智力可料而知也 陽武峪巡檢司縣西七十里

石佛谷

石佛峪口

西三十里北接朔州界元末用石壘寨明因之

南通廟嶺其西北有郎嶺關明洪武七年千戶王原築

郎嶺口在西北四十里 雁門有東陁西陁之險崞縣有

陽武石門之險 朔州西南七十里翠峯山東連石碣峪

唐志崞有石門註石門關即今崞城也

蘆板口西南六十里明時傳烽崞縣繇蘆板始 金志崞鎮

一蘆板 蘆板寨巡檢司明設今裁

鵬窩梁口北八十里 胡松答翟中丞書五寨堡遠距偏頭

寧武二關幾可二百里許敵小至要不敢深至其域大舉

則將自保不暇是亦無用之贅員也莫若移五寨守備於

夾柳鵬窩梁之間使守西隘入口

蓮花口堡明正德十一年築 蓮花口西為盤道梁界 嘉

靖二十年七月俺答繇小蓮花口火燒溝入繇山頂牛心

寺宋家溝白九川廟嶺梁南下是月復繇此口出 牛心

寺口北五十里 宋家溝口北五十里 白九川口西北

四十五里 廟嶺梁西三十里 王野梁口北五十五里

此與夾柳樹路相通明嘉靖後修內邊首及王野梁

八岔口堡明正德十一年八月提督都御史李鉞經畧關東

西隘口各築堡置官守之八岔小蓮花於是創築堡焉

弔橋嶺北二十里上有秦王寨 弔橋嶺巡檢司後改入石

嶺關隸陽曲縣

元岡口堡西南八十里 有孟良城址存堡南十里有焦贊

寨

石匣口西北四十五里

平山梁口西北三十五里

燕兒水口北六十里

羅漢洞口西南七十里 胡松答翟中丞書代朔崞峙之間

土名魚兒川等處地頗曠衍截長補短方可數千頃許比

緣四方亡命逋逃於此俱治有屋廬伏藏間諜至難詰禁

又斬伐山木日相吞食宜擇為眾所推者使為保長總小

甲以管轄之防秋則授之器甲令擺邊

唐林崗南五十里南北通衢三關要道

上陽武西四十里 咸陽西北二十里 清安堡北三十里

段家堡 南高堡 朔寧堡 榆灣堡 焦家堡 西

莊堡 神山堡 橋溝堡 茹莊堡 天寧堡 大常堡

懷化堡 辛莊堡 半址堡 雙山堡 南賈堡 上

封堡 同樂堡 貴茹堡 崇仁堡 橫道堡 白石堡

班聶堡 天涯寨 茹岳堡 蔡家堡 天元堡以上土堡

原平堡 清安堡 清和堡以上

山西通志卷第十五

大時元速不台入保德忠孝軍總領完顏陳和尚名彝字良佐

戰於倒迴谷口大敗之 明弘治初總督文貴欲立橋疏

上不報正德十四年都御史張貴奉命營度不可遂止

天橋子墩東四十里明萬曆間知州韓朝貢移鐵匠舖於

天橋墩前 天橋河東岸石上有漕濶三丈餘深淺不等

乃古人疏鑿通漕地也 河西崖壁書皇子安王府掾史

僕散翰之與怯薛丹官人和者同奉命特遣水運大木

前至長安上至積石州東有一地名打羅缺下徹天橋子

訪缺此二河道水石險惡自古以來未嘗敢行所以部率

諸官集缺拜祭缺乘駕缺於此皆賴天神所護我國家洪

福之所致也故書於此以示後歲在乙亥至元十二年六

月十八題 嘉隆紀聞嘉靖十一年六月御史徐汝珪陳

邊務言宜漕石州保德之粟自河而上以達延綏 明崇

禎三年七月御史黃道直請發銀易米一由保德州河道

一由洛宜陸道往陝西賑饑

國朝康熙三十年冬命郎中囊吉理布泰等督運大同府大

有倉米往賑陝西三十一年三月運米十三萬石有奇舟

四十有八繇湖灘河起至潼關止往返凡五浹月 嘉靖

間套寇八邊河曲守備王世臣及千總李虎遇之於水橋

峽戰沒

水寨東北十五里黃河中巋然中流似三門砥柱上有水寨

寺有渡 寨在河北石家山南高二十八丈周二十八丈

元天曆元年詔晉寧冀寧兩路代州之雁門崞縣之陽

武保德州之寨底天橋白羊靈石之陰地關嵐州之大澗

皮庫石州之塢堡口皆穿塹壘石為固調丁壯守之寨底
 卽水心寨也 宋時麟府屯重兵皆河東輸餽雖地里甚
 邇而限河津之阻土人利于河東民罕至則芻粟增價咸
 平中上嘗訪使邊者言河裁濶數十步乃詔河東轉運使
 鄭文寶于府州定羗軍經度置浮橋人以為便會李繼遷
 圍麟州令乘傳晨夜赴之圍解

花園磧

對鴉兒灘

花園寨在州西御道塢下

州北花園子墩西

南二十八里西至韓家川河畔四十里踰河由府谷大堡
 村至永興堡一百二十里至窟籠塢一百里與縣界

韓家川磧黃河至天橋峽業有自西而南之勢花園磧又少

屈而北而復南至韓家川則西流全折而南流矣對郝家角黃

草灘磧

對黃草灘

灰弔磧

神山磧

對小本

山西至馮家川踰河由

府谷小木山至神木縣一百六十里

三石頭浪

對馬真村

主

眉磧

近裴家川口

黃河渡

下園渡州西一里明正德前設官船四水手五十

名後以延綏兵由唐家會渡廢之萬曆十四年延綏兵改
 由此渡復設官船五今渡改東溝 東溝渡州城下 故

城渡州西二十里

花園子渡州西二十五里

柴家窰

渡州西三十里

柴家窰墩西南三十八里西北至柴家

窰河畔三十里踰河由府谷熟芝坪至鎮羗堡八十里

韓家川渡州西五十里

神山渡州西六十里

神山墩

西南六十八里

馮家川渡州西南九十里

桑園渡州

西五十里對石支坪

水寨渡州東北十五里又東北至

鐵匠舖河畔十五里

天橋子渡州東三十里

黃河北一里自天橋子入州境西流經城下至韓家川折而南至後會村入興縣界共袤一百四十里 踰河府谷六

堡

狐山 木瓜園 黃甫川

鎮羗

清水營 永興

金志有大堡津汝谷津

明巡撫宋統殷恢復府谷詩序保德府谷一河相望雖分疆域而安危共之屬以逆氓負固久稽天誅予竣役平汾直抵保德數月不下之賊八日而復漫書之以記歲月時庚午仲秋二十六日也

石梯山東北二十里山上墩堡在石梯中有一夫當關千人却走之勢扼而守之騎不得西下石梯灘州東北二十里石梯山下萬曆二十六年水衝成河一名楊家灘石梯子墩西三十里

黑石崖棧西南七十里中有石洞 山半石徑上聳蒼崖下

臨黃河長二十里逶迤屈盤行旅前後不克見明萬曆三十八年知州胡柟設義勇於林遮峪令巡緝焉又與禪師崖棧州西南六十里胥關孔道

深溝水南三十里流至柴家窰入黃河興縣往來要道最爲崎嶇保德稱十里九溝深溝尤險 保德志唐爲岢嵐地乃合河縣合河關北地也

蒼水山東南一百二十里岢嵐州界東南至科舉村八十里岢嵐州界至蒼水山一百一十里地雜岢嵐州界 明知州胡柟請設義勇官

後橋川李堂題安西樓詩云俯視禹門深峽水遙看修辨後橋川詩注俗云後河川歐陽文忠集作後橋川 鹿徑溝閻爾梅詩赤豹橫眠鹿徑溝

陳家寨東十里 秦峒寨東二十里 花園寨西南二十里
廟溝寨東南五十里 新哇寨東南五十里 剷剷峻
寨西南五十里 叢林溝寨東六十里 禪房寨南八十
里 王家寨東南六十里

河曲縣

河曲縣長城河口舖東北接老牛灣常樂墩河曲界首長城
胥沿黃河墩胥列垣內南有五舖又南爲虎兒戰墩東直
樺林子堡又南爲咽喉墩又南爲天峰一墩二墩東直樓
子營堡又南爲蒿卯二墩三墩又南爲拒虎墩東直羅圈
堡又南爲萬斛浴墩黃河勢迤西又南爲鎮河一墩二墩
四墩五墩又南爲靖狐一墩二墩又南爲守河一墩東直
灰溝營又南爲守河三墩五墩黃河勢復迤東又南爲塹

河墩西直垣上守河八墩又南爲平泉墩西直垣上守河
九墩又南爲楊家寨墩西直垣上守河十墩東直唐家會
堡又南爲白溝營墩又南爲顯寨墩西直垣上橫牆墩以
長城勢將盡有橫牆入黃河濬故名之也又南爲却狐墩
山西長城界止共爲垣二百五十五里黃河又南直五花
營堡又南直得馬水堡又南直楊免堡又南直石梯隘口
口東枕高岡西臨黃河全晉長城勢蓋始于此越河則陝
西延綏清水營石梯隘口東南十五里爲河曲縣

樺林堡北一百一十里堡北距關河口明成化間建防守一

軍二百隸偏關援兵營 嘉靖二十四年總督翁萬達疏

自西黃沙樺林子起至唐家會止爲垣六里有奇塹再倍
之增敵臺四舖屋十二品窖六千六百四十九暗門一水

口四

樓子營北九十里明宣德間建周四百六十步設守備一員軍六百弘治十五年都御史史琳言樓子營去偏頭關七十餘里宜儲餉以備客兵請城之詔可秦邊紀黃甫川一河之隔岢嵐之樓子營也

羅圈堡北八十里明弘治間建北六十里有楊家寨舊調鎮西衛守禦今革在老牛灣南卽常樂墩河口墩也北八十里又有集義城今廢

灰溝營西北七十里卽河保營明宣德間建周五百五十步東西二門成化間都御史李侃置恒美倉設守備一軍八百冬月冰合調偏老等軍萬餘謂之禦凍後改叅將統軍三千罷禦凍軍王越禦寇方略疏灰溝營與清水營相

離四十里偏頭關與延綏止隔一河本關除遊兵之外尚有堪戰軍馬四千於內選出一千聽候河西傳報聲息警急船隻一便一同渡河協助戰守大同遊兵亦選三千在大同左右衛或朔州操守相隔延綏止是四程一聞偏頭關灰溝營傳報挨次而進足可應援事緩卽回本處操守用省邊備延綏經久之策無出于此

楊家寨西北七十里明初調鎮西衛兵守之後裁

唐家會堡西北六十里明正統間建周一百三十步設操守一軍二百後益七十有四秦邊紀黃甫川之岢嵐堡東南至灰溝營唐家會渡河直達偏頭關弘治十四年火篩自七里溝入至唐家會

五花城堡西北五十里土城周五百步明五花營黃河東

岸橫橋墩山西鎮界止

河會營北四十三里卽潞澤營明設守備一軍五百萬曆間
總督蕭大亨議遶年冰合繇潞澤營始調客兵二千駐守
十一月集二月罷 萬自約記魏中丞公會制臺王公在
河曲營城上下荒度得要地爲今河會堡自河會至河曲
營城三十里南至石梯隘口三十里河會迤北二里爲下
營又西北十五里爲康家會北地平坦無險步河抵黃甫
川僅三十里河開則險在水河凍則鎮守標兵及東西二
路偏老馬站諸營士卒共防範焉始事萬曆丙申之三月
逾年秋告成城垣周圍二里八十步內建營房六百間
得馬水堡西北四十里舊設巡檢司後裁土城周一里高一
丈二尺 得馬水縣西北四十里相傳尉遲敬德得馬於

此水西流入黃河 得馬水關巡檢司舊隸保德州省志
關在保德州東北一百里 元太捕寨在得馬水溝三面
陡絕東面一徑長二十丈廣裁二尺

五門樓寨西北三十五里險峻可守

楊免堡西北十八里今廢 明成化九年火篩至楊免堡十
九年春正月又至楊免堡

石梯隘口西北十五里東枕高岡西臨黃河南北二門上建
樓邊牆蓋始於此東南至縣城路尤險 邊牆自石梯隘
起至老營了角墩長二百四十里惟船灣斬賊溝娘娘廟
石城鋪天險壁立 秦邊紀延綏東路長邊盡於清水營
之紫城寨以及黃河塽踰河則山西

火山西五里山逼黃河巖石胥赤 宋志太平興國七年建

山西通志 卷一六
七
火山軍領偏頭雄勇董家橫谷桔槔護水六砦慶曆初置
下鎮砦嘉祐六年廢偏頭砦熙寧元年廢桔槔砦 元豐
九域志火山軍領砦一下鎮

天橋峽

保德州界

詳保德

黃河在縣城西五里東北自古東勝州界歷廢武州西北二
百五十里南流入縣境西流八十里至平泉村復南流至
天橋子九十里入保德州界 金興定四年隸州殘破徙
治黃河灘許父寨 河灘 峪灘東北二十五里黃河洲
中廣八十九畝 五門灘西北三十里黃河洲中廣二頃
三十畝 棘鐵灘西北七十里周九十畝 葑菜灘西北
七十里周一頃二十畝 王鐵灘西北八十里周一頃三
十畝 榆樹灘北八十里周一頃二十畝 太子灘娘娘

灘西北九十里黃河中周五頃

渡口

九梁津北一百

里宋慶曆間置榷場路通西夏

今廢

唐家會津西北六十

里 陰灣渡西北四十里

楊免渡西北二十里

芽子

坡渡西五里通陝西清水營黃甫川

巡檢司村巡檢司東北三十五里

河曲營明嘉靖二十二年總督翟鵬疏鎮河堡自老營界三
百九十餘里鑿塹者十之九為垣者十之一高濶以一丈
二尺塹深濶以二丈為式

石城舖北九十里 沙泉舖南六十里 雙墩西七十里

魯家口西北七十五里 牛角尖北九十里 吳峪口北
八十里 辛家坪北八十里 斬賊溝西北五十里

解州

橫嶺南三十里芮城界分雲嶺中條之脊也兩山夾路直
岔嶺少東為荻子谷又東為五龍谷在州南五里谷口西
上十五里為橫嶺即中條山脊其自北而下者為弓長溝
又東為堡子谷又東十里為大虎谷谷中有將軍堡堡後
有鳳凰觜觜西過連雲棧至橫嶺嶺有陽關寨寨有瞻礬
窟 後秦永和二年二月建威將軍河北太守薛帛據解
縣晉建武將軍沈林子自襄邑堡馳襲之帛棄軍奔河東
林子收其兵糧

石門路通陝州大陽津渡 瞻礬窟東南為白徑嶺雙石壁
立左右叅天路不容軌名石門又東十五里為分雲嶺
秦破晉師於石門 梁朱友珪時河中節度使朱友謙附
於晉友珪遣招討使韓勅將康懷英等兵五萬擊之晉王

出澤潞救友謙遇懷英於解縣大破之追至白逕嶺夜乘
炬擊之懷英又敗梁兵乃解去晉王會友謙於猗氏友謙
醉寢晉王帳中晉王視之顧左右曰冀王雖甚貴然恨其
臂短耳

瞻礬窟 陽關寨後瞻礬窟在橫嶺東北此窟在橫嶺東路通河南靈寶涇津渡

鹽池巡檢司東南二十里蠶房村東南今移中村

長樂巡檢司東北十里鹽池北姚家莊明洪武八年置今移

中村

安邑縣

虞坂二郎谷東五里南北孔道石崖險峻車不容軌今名青

石槽 明御史張士隆修道 後魏薛鳳賢據安邑都督

宗正珍孫守虞坂不得進是虞坂崖勢袤曲南北胥可守

險故長孫彥楊侃不繇虞坂繇平陸縣東北夏縣東南之石錐壁以懾安邑東諸村乃克平之

車輞谷分雲嶺東兩山夾路可作虞坂之間道

鳴條岡北三十里東西勢若游龍 黃河距縣百餘里而近

河之裏中條山中條之裏鹽池互為高低北則姚暹渠涑水環繞於後渠之表為鳴條岡涑之表為峨嵋坡而稷山

之稷神山萬泉之介山亦距縣百餘里而近 書序湯伐

桀升自陟遂戰於鳴條之野中條山一名陟山

聖惠鎮巡檢司南五里明洪武四年置

西姚巡檢司南二十里官隸解州

北相堡 小李村堡 陶村堡 霍趙堡

夏縣

溫峪堡東一百里溫峪里溫泉山有礦洞 明嘉靖時一道

士寓此識其為銀礦嘗私煉焉後鄰壤羣不逞競取而河

南盧氏諸縣礦徒多來劫殺四十一年河東守巡道僉大

漢民兵藥箭手以禦之四十四年又移平陽府同知駐夏

縣萬曆十四年亡命角腦尚登等糾二千餘人越渡黃河

盜砂官兵迎戰賊縛指揮李材傷軍數十餘人後調兵驅

之始解散嗣後增設平陽衛軍八百名冬季守黃河諸渡

竝礦山歲以為常二十五年太監張忠駐夏縣採礦三十

三年砂盡封洞而賊盜時發防兵復擾村堡乃以省祭官

統藥箭手代之 溫泉山一名牛首山陶弘景古今錄夏

孔甲八年九月歲次甲辰采牛首山之鐵以鑄劍

虞坂山南十五里土人名三橋坂

將軍嶺

一名古石碑

東南三十里雲谷山之北一峰也陟嶺見黃

河鹽池上有洞泉水瀦而復流

雲谷山東南三十里數

峰竦峻盤踞數十里中有大谷

牛家凹西三十里西張莊安邑鋪道地瘠壤曠明萬曆元年

知縣陳世寶建堡城廣十丈袤六十丈更名喜安莊

胡張鎮堡駐防兵弁

曹張鎮堡金鎮一曹張

稷王山西七十里接稷山界

水頭鎮堡

裴介鎮堡

尉郭鎮

平陸縣

大陽渡南二里五朝志河北有關官唐志陝州陝縣有大陽

故關卽茅津一曰陝津貞觀十一年造浮梁

春秋僖五

年晉獻公假道於虞八月圍下陽卽古巖城在大陽渡北

岸十二月晉滅虢其渡河蓋繇此

漢興平二年獻帝走

陝北渡河失輜重步行唯皇后貴人從至大陽止人家屋

中獻帝記初議者欲令帝浮河東下太尉楊彪曰臣弘農

人從此東有三十六灘非萬乘所當從也劉艾曰臣前爲

陝令知其危險有師猶有傾覆况今無師太尉謀是也乃

止及當北渡使李樂具船帝步行趨河岸岸高不得下董

承等謀欲以馬羈相續以繫帝腰時中宮僕伏德扶中宮

一手持十匹絹乃取德絹連續爲輦行軍校尉尚弘多力

令弘居前負帝乃得下登船 晉懷帝遣平北將軍曹武

次大陽討劉元海不克 石勒率輕騎二萬會劉粲於大

陽大敗晉監軍裴邈於澠池 東晉義熙十三年二月冠

山西通志 卷之六
軍將軍檀道濟建武將軍沈林子自陝北渡河拔襄邑堡
魏建義二年爾朱榮與元顥相持於河上顥令都督安
豐王延明緣河據守榮未有舟船不得即渡議欲還北更
圖後舉黃門郎楊侃高道穆等固執以為不可屬馬渚諸
楊云有小船數艘求為鄉導榮乃令都督爾朱兆等夜濟
登岸擊擒顥子領軍將軍冠受延明逃散兆與賀拔勝等
自馬渚西夜渡數百騎 魏大統三年七月破陝州高千
走渡河賀拔勝追擒之於是宜陽邵郡皆來歸附 金貞
祐二年宣差都提控從坦言絳解二州村落之民皆持鹽
布易米今大陽等渡乃不許粟麥過河願罷其禁官稅十
三則公私皆濟矣從之

茅津渡東二十里傅巖前明洪武三年設巡檢司先為沙澗

渡後更名沙澗茅津渡 春秋文公三年秦師伐晉濟河

焚舟取王官及郊晉人不出遂自茅津濟封殺尸而還

注左傳曰秦伐晉遂自茅津渡預曰在縣西南有茅亭即
茅城水經注陝城北對茅城故名茅亭茅戎邑也公羊曰
晉敗之大陽者也津亦取名焉西魏太師賀拔勝攻弘農下河北擒郡守

孫晏遂破東魏軍於沙苑 茅津堡東二十里茅津鎮西

黃河北岸設遊擊署駐防

白浪渡東一百八十里黃河岸北自城東上永泉十八盤椅

子石三峰寺交口處皆河厓也明洪武四年設巡檢司

國朝順治十三年裁 宋建炎初武義大夫翟進守澠池界

金人犯白浪隘將渡河進破之 金人長驅渡河澠池人

張玘禦之白浪口金人不得渡 茅津白浪舊設官吏弓

兵餘僅設水手

洪陽渡西四十里葛趙村

黃河南三里自河津龍門至蒲州南至於潼關折而東至芮

城逾平陸東至於砥柱又東過垣曲下孟津 金貞祐四

年十月元攻潼關已巳沿河惟存通報小舟餘皆焚之

興定元年五月丙午立河北求仕官渡河之法曾經總兵

者白樞密院餘驗據聽渡九月癸卯立沿河水牆鹿角五

年八月壬子朔諭樞密院河北艱食民欲南來者日益多

速令渡之十月辛卯詔石壕店沔池永寧縣各屯兵千人

三門山東五十里黃河中 綱目質實山有三門禹鑿以通

南曰鬼門中曰神門北曰人門故謂之三門集津 金陝

州湖城鎮二三门集津 興定元年六月乙丑設潼關副

使及三门集津提舉官 金南遷後置提舉三门集津南

北岸官 砥柱峰在三門東迤南黃河中高數仞石形如

柱禹貢東至於砥柱即此 關流上激六峰下阻十九灘

金貞祐四年元兵過陝州自關以西皆列營柵亘數十

里尚書左丞胥鼎慮進薄京畿遂以河東南路懷孟諸兵

合萬五千由河中入援又遣遙授河中府判官僕散掃吾

出領軍趨陝西并力禦之且慮北兵扼河移檄絳縣吉州

孟州經略司相與會兵以為夾攻之勢已而北兵果由三

門集津北渡還至平陽鼎遣軍拒戰不利乃去

鹽坂東北七十里中條山今名青石槽 車輞谷東為二郎

谷又東為虞坂在安邑東郭村南明御史張士隆修道可

通鹽車虞坂東為巫咸頂 崔銑張御史治路記河東鹽

行四方公私皆利之運司東南二十里曰青石槽道狹而

山西通志 卷十六 關隘
險如永巷然長七里徒者負者亦艱行自槽之南如陝州
中有曰張店曰茅津者凡六十里有土坂高二丈溝深
則半之兩崖對立而中隘正德八年秋張御史取河津稷
山工百三十人芮城安邑夫六百名鑿石槽深一丈有奇
濶倍之石槽平行旅說之已又取平陸夫七百人治張店
茅津弘隘刊峻既月張店茅津又平傭者殺其直負者餘
其力馬行可馳車可竝兩行旅大說之又曰御史初詢於
王運使宣平陸申知縣綸又詢於衆謀協而舉民故安均
力明禁毋敢買逸民故偕因勢而治之不與險爭功故速
成太史氏曰張御史者安陽張士隆字仲修 喻時詩路
從缺嶼連如斷人在迴崖去若來

顛幹東北七十里虞坂南

通典平陸有顛幹坂

水經注

傅巖東北十餘里卽顛幹坂也春秋左傳所謂入自顛幹
者也有東西絕澗左右幽空窮深地壑中則築以成道指
南北之路謂之幹橋 今幹橋西南懸絕中央有兩道

王翰詩顛幹一入亡唇齒

張店堡東六十里虞城之外

郭也南扼顛幹北控鹽坂有險可恃舊爲南北孔道今堞
頽民尠堡內道成潦澗 今平垣營駐防

金雞堡南二里店頭鎮西有古城遺址延袤七里城內西北
隅積石如邱城在崇岡之上丹壁屹立南臨大河北望中
條土人名金雞堡一名十二連城蓋春秋時巖城也 下
陽城西南二里中條山麓東面卽金雞堡 劉昭注大陽
有下陽城虢邑左傳僖公二年虞晉所滅縣東北三十里
竹書紀年晉獻公十有九年獻公會虞師伐虢滅下陽

號公醜奔魏 水經注陝東城卽號邑之上陽也號仲之所都爲南號三號此其一焉 下陽與上陽相望繇下陽至上陽必繇大陽渡渡河猶襄樊之夾漢江也遺址表七里勢據崇岡上有關聖思鄉廟 將軍城北三十里西祁村有周倉廟

洪池鎮西北四十里虞公奔其池卽此

張谷鎮西十五里 常樂鎮西二十里 茅津鎮堡東二十里 葛趙鎮西四十里 張店堡東六十里 八政堡東二十里

芮城縣

陌底渡土人名王村曲裏渡卽古涇津渡也東南四十里王村曲通河南靈寶縣明洪武四年設巡檢司九年徙南七

里又置批驗所後裁 宋建都開封中條山北漕刑倉按

行驛路繇此故芮城令邵伯溫築待濟亭於河干以憇賓

旅 涇泉源出東北山麓卽儀家溝水土人名連搭溝水

經注弘農郡城北河水有涇津之名說者咸云漢武微行

栢谷遇辱竇門又感其妻深識之饋旣返玉階厚賞資焉

賜以河津令其鬻渡今竇津者是也故潘岳西征賦酬匹

婦其已泰何厥夫之謬官袁豹之徒竝以爲然按河之南

畔夾側水濱有側謂之涇津河北縣有涇水涇津其水南

入於河河水故有涇津之名不從門始 穆天子傳天子

自竇軫乃次於涇水之陽丁亥入于南鄭 五朝志芮城

有關官是隋以前嘗置關於涇津也 漢建安中杜畿爲

河東太守河東人衛固使兵數千人絕陝津畿至不得渡

曹公遣夏侯惇討之未至荀彧謂畿曰宜須大兵畿曰吾
單車直往出其不意遂詭道從郟津渡 魏正平二年八
月冠軍將軍封禮率騎二千從洹津南渡赴弘農

黃河自蒲州南下至潼關折而東流經縣境七十里入平陸
界 陌底渡上六十里至永樂渡下六十里至茅津渡

橫嶺卽直岔嶺也縣東北六十里中條山巔路通解州南北
孔道而去村聚遠明萬曆四十年建關王廟於嶺上 直
岔嶺在甘棗山東自橫嶺以南爲山之陽跨芮城平陸自
橫嶺以北爲山之陰跨解州安邑夏縣聞喜 邵濬治中
條山路記中條直岔嶺四十里爲赴郡省道南二十里屬
芮北二十里屬解徑皆緣崖臨谿高深數百丈北尤偏仄
石磊砢軋羸馬蹄予命僧宗睿合南北四十里之窄者圻

者斫者砮者悉舉而剗鑿之

喬頭堡

陌底堡

坑南堡

朱呂堡

絳州

柏壁城西南二十里

秦王堡在柏壁

樊村堡西南二十

里 元魏置柏壁鎮至太武廢鎮置正平郡兼治東雍州
於西南柏壁 北齊斛律光嘗屯兵於此 後周明帝改

絳州徙聞喜縣龍頭城復徙柏壁建德中徙稷山之玉壁
隋開皇初自玉壁始徙今治 元陳獻柏壁記絳附郭邑

曰正平地多崇岡峻嶺西南迤邐二十里有巨坂尤高峻
古柏壁關也上有秦王堡深溝巨壑絕崖陡險南北斷壁

截然千仞中有舊途相去百步餘下而復上其巔實古關
門遺趾廣僅一軌歷歲月久遠霖雨所傾頽山水所灌滌

望其途如線騎不可竝車不可旋服牛輿馬倘失蹶斃矣
 州人山北道廉訪使李思敬正平尹閔道經營之旬日險
 隘為坦途 後周武成中齊將斛律敦侵汾絳鄭國公達
 奚武以萬騎禦之敦退武築柏壁城留開府權巖薛羽生
 守之 唐武德二年劉武周將宋金剛進逼絳州復陷龍
 門關中大震高祖欲棄大河以東謹守關西秦王世民曰
 太原王業所基國之根本河東殷實京邑所資願假臣精
 兵三萬必平武周克復汾晉乃引兵自龍門渡河屯柏壁
 與金剛相持金剛屢敗食盡北走秦王追及大敗之 通
 典大唐武德初劉武周據太原使其將宋金剛屯於河東
 太宗往征之謂諸將曰金剛懸軍千里深入吾地精兵騎
 將皆在於此武周自據太原專倚金剛以為捍蔽金剛雖

眾內實空虛搶掠為資意在速戰我堅營蓄銳以挫其鋒
 分兵汾隰衝其心腹彼糧盡計窮自當遁走當待此機未
 宜速戰於是遣劉弘基等絕其糧道其眾遂餒金剛乃遁

武平關西三十里北齊屯兵以防周 周村堡西三十里

周村墩 周村橋 唐志西有武平故關 通典姚襄城

洪洞晉州武平關三關竝今絳郡正平縣界

家雀關通典有高齊故武平關在今縣西三十里故家雀關
 在縣南七里竝是鎮處

泉掌堡西北三十里即古長秋鎮也 北齊圍周宜陽韋孝

寬曰宜陽一城之地未能損益然兩國爭之勞師數載彼
 多君子寧乏謀猷若棄崤東來圖汾地我之疆界必見侵
 擾今宜於長秋速築城以杜賊志是歲齊人果解宜陽圍

狄莊墩東十里 楊莊堡東南二十里 曲村堡南二十里
蘭村堡南三十里 樊村堡西南二十里 三林墩西
十里 古交墩西二十里 平原堡北十里 義泉墩北
二十里 蘇村堡北三十里

聞喜縣

留莊隘東南七十里中條山南通垣曲縣北接絳縣冷峪口
土人名劉莊野東西二山之間溪水北來相傳有漢高祖
祖墳對面斷壁千仞清湍橫流 唐以張濬爲河東行營
兵馬招討制置使京兆尹孫揆爲昭義節度使副之韓建
爲供軍使以朱全忠李匡威赫連鐸竝爲招討使樞密使
駱全諲爲行營都監以汴甲三千爲帳下發五十二軍邠
寧鄜夏雜虜合五萬討太原先是汴華邠岐兵絕河會平

陽汴將朱崇節已戍潞濬慮汴人遂據有之乃令揆分兵
趨潞以中人韓歸範持節護送至軍會太原將李存孝方
攻潞揆至長子爲存孝所擒汴人亦棄城去濬次陰地關
諸軍壁平陽存孝擊之皆大北委仗械去濬斂衆夜遁比
明軍失大半存孝進掠晉絳慈隰其鋒甚盛濬間道出王
屋奔河清桴而濟麾下略盡全諲仰藥死建遁去 張濬
出王屋道卽留莊隘道也

橫嶺東南九十里山脊橫亘下有三泉源出白石下土人名
曰白石河接垣曲界 聞喜東南橫嶺乃小橫嶺也 劉

莊野舖南接垣曲縣梨樹舖 橫嶺背設巡檢司

秦澗南五十里澗之上爲秦王嶺樵者時得銅箭鏃相傳秦
王屯兵於此下有廣澗數派相傳爲三跳處 劉武周傳

尉遲敬德還滄州秦王邀戰破之於美良川 勝水溝在杜家莊高三丈水自湯寨山至此瀑流而下入三跳澗今按在柏樊底水出崖間附草而下滴潭如有鈴聲 馬跑泉近秦王澗相傳秦王馬跑地出泉 霍州亦有馬跑泉皆太宗經戰地 張藻梁秉鈞墓碑辛巳入美良境又會天風暴寒冰合黃流而羣師平渡遂得神前口處要地因入陝右

蘭德鎮東北五十里路接曲沃隘口舖 蘭德鎮堡 蘭德舖

橫水鎮東四十五里接絳縣界設左哨

栗村鎮堡在東北路通稷山

上東鎮堡 下東鎮堡 宋店鎮堡 小郭店鎮堡 裴社

鎮堡

河津縣

龍門西北二十五里兩山壁立中通河流形如門闕東西濶八十步一名禹門西與韓城梁山竝峙 禹門渡在禹門

關元魏唐竝置關 禹門渡巡檢司在龍門山下神前村

西 太平寰宇記禹治水至龍門巡繞至山龍門山即龍

門關極險魏大統七年置戍 唐志龍門有龍門關有龍

門倉開元二年置 元王思誠河津總圖記禹門渡在縣

西北二十五里即古龍門關也按辛氏三秦記河津名龍

門河出龍門口其廣不及八十步舟楫往來一移刻而可

濟凡河之流無有便於此者 明一統志禹門渡在河津

縣西北三十里唐有龍門關置於此 正義龍門在同州韓城縣北五十里禹鑿

廣八十步 知縣吳寶林龍門鐵索記購鐵募工續鑲成索癸未索成計長七十餘尋計鑲一千四百三十有奇每鑲重二十兩總計鐵二千二百斤瀕河之東崖鑿石成穴穴樹柏椿凡二十有四以鐵索橫絙椿上須與數十舟手攀鈎挽索魏孝武西遷周太祖令大都督薛崇禮據龍門蟻附而上引參軍薛端西行崇禮尋失守遂降東魏東魏遣行臺薛循義都督乙千貴率眾數千西渡據楊氏壁端與宗親及家僮等先在壁中循義乃令其兵逼端等東渡方欲濟河會日暮端與宗室及家僮等叛之循義遣騎追端且戰且馳遂入石城柵得免柵中先有百家端與并力固守貴等數來慰喻知端無降意遂拔還河東東魏又遣其將賀蘭懿南汾州刺史薛琰達守楊氏壁端率其屬并招喻村民第多設奇兵以臨之懿等疑有大軍便即東遁爭船溺死者數千人端收其器械復還楊氏壁周太祖遣南汾州刺

史蘇景恕鎮之徵端赴闕 周太祖狩於龍門帳下楊忠獨當一猛虎左挾其腰右拔其舌太祖壯之北俗謂猛虎為掩于因以字之 齊神武入關關右行臺薛循義自龍門濟河招下西魏北華州刺史薛崇禮 周天和五年齊將斛律明月率大眾於汾北築城西至龍門六年齊王憲率眾二萬出自龍門齊將新蔡王王康德以憲兵至潛軍宵遁憲乃西歸仍掘移汾水水南堡壁復入於齊齊人謂略不及遠遂弛邊備憲乃渡河攻其伏龍等四城二日盡拔又進攻張壁克之獲其軍實平其城壘明月時在華谷弗能救也 周天和六年齊將斛律明月寇邊於汾北築城自華谷至於龍門 斛律光將兵度玉壁至龍門周有移書別須籌議詔吏部尚書馮子琮乘傳赴軍與周將韋

孝寬面相要結龍門等五城因此內附 唐高祖大業中拜山西河東慰撫大使擊龍門賊母端兒射七十發皆中賊敗去而斂其尸以築京觀盡得其箭於其尸 隋大業十三年八月癸巳唐高祖次龍門突厥來助隋驍衛大將軍屈突通守河東絕津梁壬寅馮翊賊孫華土門賊白元度皆具舟以來逆九月戊午以少牢祀河乃濟甲子次長春宮

黃河正義按河在冀州西故云西河禹門發源河水小積石

山浮河東北下霹靂勝北而南行至於龍門皆雍州域也

黃河渡口縣西一十里為黃河東岸 禹門渡在禹門

縣西二十五里 陶家營渡在平陽衛屯陶家營縣西南

三十里 雙營渡在平陽衛屯雙營縣西南三十五里

夾甸渡在夾甸營故屯縣西南五十里 新莊渡在曹家

莊西縣西南五十里 修福渡南八里 黃村渡東南二

十八里 以上諸渡即韓信以木罌渡河地也明太祖兵

亦嘗由胡盧灘入關中 王思誠總圖黃河渡縣西十里

水經注橫溪水東南經夏陽縣故城北故少梁也其水

東南流於河昔韓信之襲魏王豹也以木罌自此渡 史

記漢二年六月魏王豹絕河津反漢與楚約和漢王使酈

生說豹不下八月以韓信為左丞相擊魏魏王盛兵蒲坂

塞臨晉信乃益為疑兵陳船欲渡臨晉而伏兵從夏陽以

木罌瓶渡軍襲安邑魏王豹驚引兵迎信信遂擄豹定魏

為河東郡 史記正義按韓信詐陳列船艘於臨晉即此從

界夏陽在同州北渭城界安邑故城在絳州夏縣東北十

晉耳今安邑被襲故豹遂降也史記淮陰侯傳從夏陽以木罌渡軍服虔曰以木押縛罌以渡是也古文簡不言縛耳吳志孫靜傳策詐令軍中促具罌缶數百口分軍夜投查瀆亦此法也其狀圖於喻龍德兵衡謂之窺筏通典木罌用木縛瓮為筏受二石力勝一人瓮間開五寸底以繩勾聯編槍於其上形長勿方前置拔頭後置稍左右後秦皇初三年慕容永為慕容垂所滅其所署河東太守柳恭等各阻兵自守姚興遣晉王緒討之恭等依河拒守緒不得濟鎮東將軍汾陰薛彊先據楊氏堡引緒從龍門濟河遂入蒲坂恭勢屈請降唐公李淵至龍門汾陰薛大鼎請勿攻河東自龍門直濟河據永豐倉河東縣戶曹任環曰環在馮翊積年請諭之義師自梁山濟河指韓城逼邵陽蕭曹文吏必望塵請服孫華之徒皆當遠迎然後鼓行而進直據永豐關中自定矣淵至汾陰以書招孫華華來見環又說下韓城遂留諸將圖河東自引軍而

西朝邑法曹靳孝謨以蒲津中渾二城降華陰令李孝常以永豐倉降唐武德二年秦王世民自龍門渡河屯柏壁唐中和二年李克用自陰地趨晉會河中三年使弟克修領毅騎五百渡河克用自夏陽濟留薛阿檀扼津口次同州壁乾坑敗賊於梁田坡明崇禎十七年正月李自成繇韓城煤航渡河入犯平陽

胡盧灘西南二十里汾水經此入河汾河縣南八里東自稷山界西來南流至榮河汾陰祠下入於河明隆慶四年東徙至胡盧灘入河遠亭里胡盧灘堡明崇禎三年建

胡盧灘渡浮橋

國朝康熙十一年知縣馬光遠建今胡盧灘沒於河而汾水黃河交會自屬關隘要地

西磴口入鄉寧路在縣北三十五里有鎮磴堡永安堡 河
南武備寨南十里唐建 張家崖下堡西南三十五里明
崇禎五年建

薛戍堡在小亭村東所以控黃河岸也金皇統間築村寺有
守禦官題名

南午芹堡 北午芹堡 通化村堡 衛村堡

稷山縣

玉壁關城在縣西南一十二里西魏王思政築遺趾屹然後

為玉壁渡 玉壁渡西南十二里汾水之陰元魏置關後

為渡南有荆平渡西南有楊村渡薛村渡東南有苑曲渡

費村渡崔村渡 汾河玉壁渡縣西南八里今廢 通典

後周勳州故城在今縣西南十二里即玉壁城為周氏重

鎮齊神武再攻圍皆不克 通考玉壁乃西魏大統八年

王思政所築齊神武攻圍不克至十二年韋孝寬守之齊

神武又攻圍六旬不克 魏大統八年十月齊神武侵汾

絳圍玉壁周太祖出軍蒲坂將擊之軍至皂莢齊神武退

周太祖度汾追之遂遁去 王思政鎮弘農以玉壁地在

險要請築城即自營度移鎮之遷并州刺史仍鎮玉壁文

帝大統八年東魏晝夜來攻守禦有備卒不能克復鎮弘

農周太祖命舉代已者乃進所部都督韋孝寬時論稱其

為能知人 東魏興和三年十月甲寅齊獻武王圍寶炬

玉壁十一月壬午班師 韋孝寬大統八年轉晉州刺史

尋移鎮玉壁兼攝南汾州事先是山胡負險屢為劫盜孝

寬示以威信州境肅然十二年齊神武傾山東之眾志圖

山西通志 卷十一
西入以玉壁衝要先命攻之連營數十里至於城下乃於城南起土山欲乘之以入當其山處城上先有兩高樓孝寬更縛木接之令極高峻多積戰具以禦之齊神武使謂城中曰縱爾縛樓至天我會穿城取爾遂於城南鑿地道又於城北起土山攻具晝夜不息孝寬復掘長塹要其地道仍飭戰士屯塹城外每穿至塹戰士卽擒殺之又於塹外積柴貯火敵人有伏地道內者便下柴火以皮鞞吹之吹氣一衝咸卽灼爛城外又造攻車車之所及莫不摧毀雖有排楯莫能抗孝寬乃縫布爲縵隨其所向則張設之布旣懸於空中其車竟不能壞城外又縛松於竿灌油加火規以燒布并欲焚樓孝寬復作長鈎利其鋒刃火竿來以鈎遙割之松麻俱落外又於城四面穿地作二十一道

分爲四路於其中各施梁柱以油灌柱放火柱折城并壞孝寬又隨壞處豎木柵以扞之城外盡其攻擊之術咸拒破之神武苦戰六旬傷及病死者十四五智力俱困因而發疾其夜遁去廢帝二年孝寬移雍州刺史恭帝二年周文帝北巡命還鎮玉壁周明帝保定初以孝寬立勲玉壁遂於玉壁置勲州仍授勲州刺史齊人遣使至玉壁求通互市許之武帝建德五年東伐齊過幸玉壁觀禦敵之所深歎羨之移時乃去孝寬請爲前驅帝以玉壁要衝非孝寬無以鎮之不許孝寬鎮玉壁前十二年後十八年玉壁城中無水汲於汾齊神武移汾一夕而畢無水而城仍不下是水道尚存也齊神武攻周玉壁士卒死者甚衆神武恚憤疾發周文下令曰高歡鼠子親犯玉壁劍弩一

發元凶自斃神武聞之勉坐以安士衆悉引諸貴子使斛律金唱敕勒歌神武自和之武定四年八月齊獻武王自鄴帥衆西伐文襄王會於晉州九月圍玉壁以挑之十一月班師文襄王如晉陽西魏廢帝元年以大將軍達奚武出鎮玉壁武乃量地形勝立樂昌胡營新城三防齊將高苟子以千騎攻新城武邀擊之悉虜其衆西魏大都督楊忠與怡峰解玉壁圍隋爲高梁縣後徙汾北故城址尚存唐武德二年裴寂與劉武周戰度索原寂敗略陽郡公道宗年十七從秦王討賊王登玉壁城以望謂道宗曰賊怙衆欲戰爾計謂何對曰武周席勝鋒未可當正宜以計摧之且烏合之衆憚持久若堅壁以頓其銳須食盡氣老可不戰擒也王曰而意與我合旣而賊糧匱夜引去追戰滅之

華峪城西北二十里北周右丞相斛律光築今爲華峪鎮

斛律光寨在縣西北二十里峪口村屯黃華峪在紫金

山仙掌峰間北齊武平元年冬右丞相并州刺史斛律

光率步騎五萬於玉壁築華谷龍門二城與周宇文憲拓

跋顯敬相持憲等不敢動光乃進圍定陽仍築南汾城置

州以逼之萬餘戶竝來降附周天和五年冬齊將斛律

明月寇邊於汾北築城自華谷至於龍門六年正月詔柱

國齊公憲率師禦之三月巳酉憲自龍門度河斛律明月

退保華谷憲攻拔其新築五城周建德五年趙王招率

兵出稽胡與大軍犄角敕韋孝寬爲行軍總管圍守華谷

以應接之

平隴城西五里斛律光築今為平隴鎮 武平二年斛律光

率眾築平隴衛壁統戎等鎮戍十有三所周柱國普屯威

韋孝寬等步騎萬餘來逼平隴與光戰於汾水之北光大

破之俘斬千計 齊武平二年左丞相段韶出晉州道到

定隴築威敵平寇二城而還 高歡城在縣西五里齊神

武攻玉壁時所築即平隴鎮也 韋孝寬守汾南玉壁斛

律光守汾北平隴可稱強對

吳城堡西十里 下迪堡西二十里胥明嘉靖二十二年知

縣于藁設高厚完固可以備盜

管村堡東十里 大杜堡東北二十里 小河鎮南十五里

華峪鎮西北二十里 翟店鎮南三十里

絳縣

橫嶺關南五十里中條山東南通垣曲縣設巡檢司 漢永

初五年羌入寇河東至河內百姓相驚多奔南度河使北

軍中候朱寵將五營士屯孟津詔魏郡趙國常山中山繕

作塢堠六百一十六所志於要道以概其餘 元初元年春遣兵屯

河內通谷衝要三十三所皆作塢壁設鳴鼓 魏肅宗時

南絳賊陳雙熾等聚眾自號建始王與大都督長孫稚宗

正珍孫等相持不下詔裴良為解汾州慰勞使 元至正

十八年曹濮賊分道踰太行焚上黨掠晉冀陷雲中雁門

代郡烽火數千里復大掠南且還察罕帖木兒先遣兵伏

南山阻隘而自勒重兵屯聞喜絳陽賊果走南山縱伏兵

橫擊之賊皆棄輜重走山谷其得南還者無幾乃分兵屯

澤州塞碗子城屯上黨塞吾兒谷屯并州塞井陘口以杜

太行諸道賊屢至擊却之河東悉定詔便宜行闡外事
橫嶺關巡檢隸垣曲 冷口峪南十五里峪中四時常寒
路通聞喜留莊隘 沙峪口東三十里壁峰峭絕 陳村
峪東南十五里峪在太行中條兩山間路通垣曲縣界帶
溪水發源於此 李罕之夜襲潞州入之自稱留後攻沁
州執刺史守將送欵於汴朱全忠命丁會援之與李嗣昭
戰含口不利 葛從周取澤州嗣昭與會戰含山執其將
一人斬首三千級遂取澤州 唐大順元年潼關防禦使
韓建以兵屬張濬代晉濬敗建自含山遁歸 朱全忠兵
欲西以河中節度使王珂晉之壻也恐爲患乃顧張存敬
侯言以大繩與之曰爲我持此縛珂來存敬等兵出含山
破晉絳二州遣何緡以兵守之絕晉援存敬圍河中珂告

急於晉晉以緡故不得前珂卒降全忠 龐籍司馬池碑
先是運兩池鹽率繇蒲坂亂竇津截大陽經砥柱之險路
迂且惡至道中有建白開含山道自聞喜抵垣曲比前運
減費什六七陝人無賢愚皆推服其功府君未冠獨曰鹽
利通流諸夏前之議運者未知此道之便而利人與有而
不知知而不爲謂前無仁智者乎殆有巨害於其間耳衆
皆少之而不然其說其夏山水潰出運車暨人牛漂流者
不可勝計道遂廢衆始服焉

河王峪東三十里 續魯峪東五十里路通沁水縣界兩崖

陡峻素稱險隘

大交鎮東四十里 橫水鎮西二十里 鄭柴 南柳 吉

峪胥去縣二十里 范村寨東十五里築堡 南樊寨東

三十里周二十餘畝 郇王寨東二十五里郇王村東垣曲縣

橫嶺關西八十里絳縣東南界中條山之要隘也 橫山絳

縣南四十里東南跨垣曲縣界名大橫嶺山毫清河源此

風山西六十里為橫嶺關入口地山多風上建玉皇關帝二

廟 轉山西七十里遙連橫嶺山勢曲折迴轉 水經注

清水出清廉山之西嶺世亦謂清營山其水東南流出峽

峽左有城蓋古關防也清水歷其南 魏肅宗時平絳蜀

反丹谷清廉二路險澀不通以河內太守源子恭為當郡

別將俄而建興蜀復反相與連勢進子恭為持節散騎常

侍假平北將軍征建興都督仍兼尚書行臺與正平都督

長孫稚合勢進討大破之正平賊帥范明遠與賊帥劉牙

奴竝面縛請降 元致和元年九月以汴梁行知樞密院

事也速台兒將兵行視太行諸關西擊河中潼關軍以摺

疊弩分給守關軍士 明崇禎七年八月北山賊伏轉山

要口劫銀鞘蒲州營都司薛敏忠勦之斬三十七級西路

始通 唐李建中開垣曲山路成詩 鑿開青石壁填貯白雲坑

行臺關 金志關一行臺

瞽塚山北五十里 一名鳴條山 相傳瞽瞍葬此墓址尚存 諸馮

山北五十里相傳舜生此 歷山在諸馮山後巔平廣土

人名舜王坪相傳舜耕此上有石碌砮數百下有舜井

瞽塚山翼城沁水陽城垣曲四縣交界地也 明崇禎五

年十二月流賊紫金梁老狗蝎子塊數十萬眾自陽城

來掠瞽塚劉村塏坂陳王二十餘村堡省祭周得英守北

山西通志 卷一六
山隘口爲賊所執不屈死 六年四月賊數萬屯瞽塚村
守東道葉廷桂勦之斬四十級賊驚走 八年三月賊千
餘自絳縣破馬村堡平陽叅將虎大威急追至瞽塚村斬
一百七十級賊二郎神混天猴二百餘潛伏山谷請降大
威行至翼城設計盡斬之 九年十月賊五百人盤踞瞽
塚山陽城石鳳臺撫之 十三年饑民數千自陽城聚瞽
塚山蒲州營游擊柳如金驅之
國朝順治十年土賊千餘屯瞽塚山平陽協鎮平之 十一
年三月陝西許二王世魁據瞽塚山爲巢梅大人駐兵瞽
塚鎮搜山斬百餘級餘賊皆降 瞽塚渠北四十里
黃河濟民渡縣南觀下窩以防河禁渡 南三十里黃河北
南對澠池

馬蹄窩明崇禎六年十一月流賊數十萬自濟源至垣曲倏
馬蹄窩黃河水合成橋遂捨垣曲南渡月餘始畢

五虎澗西南五十里明嘉靖時置千總一員以防礦徒 崇
禎八年十二月河南流賊聞五虎澗黃河水合成橋大隊
自河南府趨北知縣段自宏偕潞澤營防河叅將和應詔
駐河干督兵嚴守積薪焚橋晝夜不少懈賊知有備西走
上敵原東北三十里宋紹興十年秋七月岳飛使梁興渡河
會太行忠義兩河豪傑大敗金人于垣曲卽此

軹關在濟源縣西兩山相夾勢頗險阻戰國時置

狐嶺關

邵原關胥在濟源縣西

峪村堡

瞽塚村上下二堡在北 東灘村堡 臯落鎮堡

上澗堡

崖底村堡

河西堡

王茅鎮堡在西 青

廉村堡 嶺後堡 白馬神頭堡 迎駕寨在縣西迎駕
山 六郎寨在縣西南近黃河

吉州

烏仁關西六十里下臨黃河明洪武六年置巡檢司 明一

統志關在州西七十里

平渡關西北一百二十里下臨黃河明洪武六年置巡檢司

壺口西七十里

詳大寧

顏師古註壺口山在河東

黃光燁壺

口賦上寬中狹自高而下峻如建瓶駛如奔馬洪波急濺
驚濤怒瀉聽之若雷霆之鳴望之若虹霓之射兩岸環山
河底維石氣常陰沍寒早燠遲每至仲冬之交河水先結
既堅且厚人畜重任往來無阻 孟門山在黃河中流峰
壁峭絕

姚襄城西五十二里

通典故姚襄城在縣西卽姚襄所築

西臨黃河控帶龍門孟門之險周齊交爭之處 齊武平

二年斛律光築平隴諸戍還復令率步騎五萬出平陽道

攻姚襄白亭城戍皆克之獲其城主儀同大都督等九人

捕虜數千人 二年二月周遣將攻邊右丞相斛律光先

率軍禦之左丞相段韶亦請行五月到服秦城周人於姚

襄城南更起城鎮東接定陽又作深塹斷絕行道韶密抽

壯士從北襲之又使人潛渡河告姚襄城中令內外相應

度者千有餘人周人始覺於是合戰大破之獲其儀同若

干顯寶等諸將咸欲攻其新城韶曰此城一面阻河三面

地險不可攻就令得之一城地耳不如更作一城塞其要

道破服秦并力以圖定陽計之長者將士咸以爲然六月

徙圍定陽其城主開府儀同楊範固守不下韶登山望城
勢乃縱兵急攻之七月屠其外城時韶病在軍中以子城
未克謂蘭陵王長恭曰此城三面重澗險阻竝無走路唯
慮東南一處耳賊若突圍必從此出但簡精兵專守自是
成擒長恭乃令壯士千餘人設伏於東南澗其夜果如所
策賊遂出城伏兵擊之大潰範等面縛盡獲其衆 周天
和五年齊人於姚襄築伏龍等五城以處戍卒驃騎大將
軍劉雄從齊公憲攻之五城皆拔憲復遣雄與柱國宇文
盛於齊長城以西連營防禦齊將段孝先等率衆圍盛營
外先有長塹大將軍韓歡與孝先交戰不利雄身負排率
所部二十餘人據塹力戰孝先乃止 天和五年齊王憲
北攻姚襄城陷之時汾州又見圍日久糧援路絕憲遣柱

國宇文盛運粟以饋之憲自入兩乳谷襲克齊柏社城進
軍姚襄齊人嬰城固守憲使柱國譚公會築石殿城以爲
汾州之援齊平原王段孝先蘭陵王高長恭引兵大至憲
命將士陣而待之大將軍韓歡爲齊人所乘遂以奔退憲
身自督戰齊衆稍却會日暮乃各收軍 天和六年齊將
段孝先攻汾州刺史楊敷突圍出爲孝先所擒 豕宰宇
文護令中外府水曹參軍郭榮於汾州觀形勢時汾州與
姚襄鎮相去懸遠榮以爲二城孤迫勢不相救請於州鎮
之間更築一城以相控攝護從之俄而齊將段孝先攻陷
姚襄汾州二城惟榮所立者獨能自守

石梯城州西南百里龍門上口壘石爲之東北高據峻嶺西
南俯臨黃河懸崖絕壁百丈有餘非梯莫上

一名倚梯城

牛心寨西六十里臨黃河 金楊貞築橋治吉州址微存

雲臺郊東五十里 魏五城山胡馮宜都等聚眾於此即雲

臺山也 百里候魏都督高防敗於此 魏肅宗時汾州

吐京羣胡薛羽等作逆以中散大夫裴良兼尚書左丞為

西北道行臺值別將李德龍為羽所破良入汾州與刺史

汝陰王景和及德龍率兵數千憑城自守併力攻逼詔遣

行臺裴延儁大都督章武王融都督宗正珍孫等赴援時

有五城郡山胡馮宜都賀悅回成等以妖妄惑眾假稱尊

號服素衣持白傘白幡率諸逆眾於雲臺郊抗拒王師融

等與戰敗績賊乘勢圍城良率將士出戰大破之於陣斬

回成復誘導諸賊令斬送宜都首又山胡劉蠡升自云聖

術人惑之咸相影附旬日之間逆徒還振德龍議欲拔城

良不許德龍等乃止景和卒以良為輔國將軍汾州刺史

行臺如故都督高防來援復敗於百里侯先是官粟貸民

未及收聚仍值寇亂城民大飢賊知倉庫空虛攻圍日甚

死者十三四良以飢窘因與城人奔赴西河汾州之治西

河自良始也 正光末汾州吐京羣胡薛悉公馬牒騰竝

自立為王聚黨作逆眾至數萬詔聞喜裴慶孫為募人別

將招率鄉豪得戰士數千人以討之胡屢來逆戰慶孫身

先士卒每摧其鋒遂深入至雲臺郊諸賊更相連結大戰

郊西自旦至夕慶孫身自突陣賊王闕郭康兒眾大潰

明署州事知鄉寧縣李節亨以西城外地勢最高防禦為

難於西城建敵樓五座明季吉城失守敵樓半傾

秦王嶺關 馬頭關元致和元年九月秦王嶺馬頭二關穿

塹壘石

南山溝寨北六十里四面胥石崖壘級以登一人扼吭萬夫莫上刀箭砲石胥不能壞

竭石崖寨

曹花平寨

樓兒山寨險同南山溝寨

趙家

堡

白楊堡

榻村堡胥土山削築成堡

桃源鎮

度鎮

三垢鎮

鄉寧縣

龍尾磧西一百里黃河中冬結冰橋路通陝西韓城縣明洪

武四年置巡檢司後廢

香爐崖西一百里

黃河隘口

香爐崖南至師家灘二十里

師家灘南至石

鼻崖五里

石鼻崖南至李家集二十里

李家集南至

船窩鎮三里

船窩鎮南至高石崖五里

高石崖南至

橋子溝二里

橋子溝南至乾柴坡二里

乾柴坡南至

河津界禹門三十里

禹門西一百里

萬歲堡西南八十里東北據高嶺西南瞰黃河絕壁百餘丈

舊建堡今剝落

雙柏樸峪

在縣西南有滴水崖文中子洞通稷山縣界

齊

天保十年二月晉州刺史斛律光率騎一萬討周開府曹

迴公斬之柏谷城主儀同薛禹生棄城奔遁遂取文侯鎮

立戍置柵而還

齊武平二年二月周師來寇遣左丞相

段韶右丞相斛律光太尉蘭陵王長恭往三月暮行達西

境有柏谷城者敵之絕險石城千仞諸將莫敢攻圍韶曰

汾北河東勢爲國家之有若不去柏谷事同痼疾計彼援兵會在南道今斷其要道救不能來且城勢雖高其中甚狹火弩射之一旦可盡諸將稱善遂鳴鼓而攻之城潰獲儀同薛敬禮大斬獲首虜仍城華谷置戍而還

官水峪東一百三十五里

三官峪東四十五里

馬壁峪在東南

上馬臺西南八十里河津縣界

金剛嶺東北臨汾吉州界近秦王山

營裏鎮東十里 官水鎮東九十里 西坡鎮西南七十里

船窩鎮黃河岸西一百里

隰州

石口則州北七十里繇東北行六十里爲橫水橋萬山之水胥滙於此又行水石間至石口則關東北道石峽達大麥郊以達靈石東道石峽達康城以達汾西 石口一名烏門關元致和元年九月烏門關穿塹壘石 趙成侯時秦攻魏趙救之石阿正義蓋在石隰等州界也 康城鎮州北一百一十里 大麥郊鎮州北一百八十里 回龍鎮

西曲鎮胥州北二百里 溫泉故縣州北二百里唐置

元廢東南十五里爲唐廢縣高唐山以南南溫泉也隸隰州高唐山以北北溫泉也隸孝義 唐武德三年劉弘基由隰州趨靈石會秦王師 王崇古嚴防山西內郡疏萬一突入太原則徐溝以南即可直上太行侵擾冀南靈石以西即可南越霍山或繇興嵐寧鄉直入石隰亦可徑出

汾西

件城鎮州南六十里西北東川河西南隰州河東北蒲縣河

東南大寧河胥滙於鎮東橋下 件城堡 後魏件城郡

址 金為件城鎮興定五年升縣 故件城蒲縣西北六

十三里吉州北六十里後魏置件城郡及縣

紫金寨東七十里紫金山上

義泉鎮南四十里 均莊北四十里 石口子北七十里

張家川堡東九十里 蒿城鎮北七十里 水頭鎮堡北

九十里 羅真鎮堡西五十里 辛莊鎮東北一百里

紫荆寨東七十里紫荆山并有石密 南孤山堡在州東但頭

里 諳真堡在州東

蒲縣

黑龍關東南六十里南北依山中通線徑為平陽府要路舊

建土城關東西二門設巡檢司明崇禎時設防禦把總一

員兵一百五十名

國朝順治初裁巡檢西二十里為化樂鎮東十里為張村岔

舖山險少行人張村岔東南二十里為臨汾縣分水舖

惡野嶺東八十里

分水嶺東北八十里

義社東南九十里

喬家灣東北叢山中

化樂鎮東四十里 張村鎮東六十里 喬家灣鎮東七十

里通臨襄洪趙 薛關鎮西二十里 古驛鎮西三十五

里通隰永大 白家莊在南 崧峪鎮北七十里通隰州

汾西

大寧縣

馬鬪關西七十五里臨黃河對宜川境唐置關明洪武二年

設舟渡通榆林延綏諸路後舟渡廢舊設巡檢司今裁

昕河西北流至馬鬪關南入於河 鎮關山在縣西南七

十五里憑臨馬鬪關 唐志西有馬鬪關馬鬪關渡

壺口在馬鬪關南二十五里孟門之上禹貢既載壺口即此

龍門飛橋在壺口石峽上元末於石岸鑿孔樹椿繫鐵

絙布木板為橋以渡兵今廢

浮圖結在縣城後北寨之巔北齊河清四年築據險以守隋

開皇六年移縣治於此大業中廢元右丞時權築北寨院

使李子厚又北倚寨之兩腋南臨昕水接築邑城彎環合

抱其形類一人在坐兩袖拱揖故大寧邑治獨異它邑

南寨縣南一里時權據守

阜城寨西十里 安阜鎮西石城村東 道教寨西二十里

單籬寨西五十里 仞梯寨西五十里 小馮寨東五

里 南堡寨南三十里 東堡寨南三十里 鳳落寨南

四十里 高山寨在孔山巔

永和縣

永和關西七十里黃河界渡河即延安府延川縣延綏水一作

關明洪武六年置巡檢司萬曆時水賊竊發設永和關營

兵崇禎時西賊賀金龍翻山洞據延綏關隔河近對永和

關復益兵 永和關鎮 五朝志永和有關官 唐志西

北有永和關 金關一永和 明志石樓縣西北九十里

山西通志 卷一
宋韓絳安撫秦晉將取囉兀城令河東發兵二萬趨神堂新路知太原府呂公弼曰寇必設伏以待我永和關雖回遠可安行無患乃由永和旣而新路援兵果遇伏詔褒之 永和關渡船一號

興德關西六十里臨黃河有渡路通延安府

鐵羅關西南七十里有渡路通延安府宜川縣 鐵羅關渡

船一號

永寧關西北一十五里黃河岸路通陝西綏德州明一統志

永寧關在石樓縣志亦不載 宋志元祐七年以慈州之

上平永寧兩關俯逼西界以州爲次邊此明一統志所本也

老牛灘黃河中近興德關

雙山東南二十五里高九十四丈遙高七里厚八十五丈亘三里盤踞七里經過一十五里兩峰對峙上有神廟路最險隘 雙山寨東二十里天生雙壁如城中通一道峰巔石罅玲瓏自陝西至平陽由此

樓山寨南六十里有石城明季築

大寨嶺西三十里西至永和關西北至下吳底村

捕狐嶺東南七十里分隸永和大寧有捕狐寨

桑壁鎮東五十里 岔口鎮北四十里 劉臺鎮北四十里

烏門里北二十里 南樓里南七十里 前乙度西七

十里 後乙度北七十里

山西通志卷第十六

